

ELEMBO YA NSAMBO

 Matondi, ndeko. Wana totikali ya kotelema, tóbondela.

² Nzambe na-Nguya-nyonso, Mobandisi ya Bomoi, mpe Mopesi ya makabo malamú nyonso, makabo ya molimo, tozali solo kozongisa matondi mingi sikawa, mpo na ntango ya malamú mingi, ya kafukafu oyo, ya bondeko kati na Bozàli na Yo; kotalisa likambo moko ya monene mpenza na bomoi na biso, Nkolo, ntango moko oyo tokobosanáká te, ata soko tosengeli kotikala ntango boni. Mpe tobondeli, e Nzambe, ete na mpokwa ya nsuka oyo. . . Tomoni na Makomi, ete na mokolo ya nsuka ya feti, Yesu atelemaki katikati na bango mpe agángaki: “Soki moto azali na mposa ya mai, áyá epai na Ngai!” Mpe nabondeli, Tata na Likoló, ete ésalema lisusu na mpokwa oyo, ete tókoka koyoka Mongongo ya Nkolo na biso kobenga biso, mpe kobenga biso na mosala mpo na Ye, kotambola pene na Ye koleka. Tomiyoki ete tosili koyoka Mongongo na Ye, na bofungwami ya Bilembo oyo, koloba ete tokómi na ntango ya nsuka, ete ntango ekómi pene. Kokisa mapamboli oyo tosengi, Tata, na Nkombo na Yesu Klisto, mpe mpo na nkembo na Ye. Amen.

Bófanda.

³ Nakolinga kobakisa boye, ete, na mayangani nyonso oyo natikálá kosala na bomoi na ngai, nandimi ete mpóso oyo ezalaki ntango ya nkembo koleka na bomoi na ngai mobimba kati na mayangani. Ata soki na nazali na . . . Namóná bikamwa minene kosalema, na ntembe te, liboso, ná mayangani ya kobondela mpo na babeli, kasi oyo eleki yango. Kozala awa, ezalaki moko na bantango ya nkembo, ya makambo minene mpenza ya bomoi na ngai. Mpe komona mwa tabernacle oyo kozwa lolenge mosusu oyo; kaka yango te, kasi na kati mpe kókoma na lolenge mosusu!

⁴ Sikawa, nazalaki kotuna Billy; azuaki ntango mingi mpo na koya kozua ngai. Alobaki ete bato mosusu bautaki kobatisama. Elingi koloba, bato oyo bazali kobatisama na Nkombo ya Nkolo na biso Yesu Klisto, na mpóso oyo, baleki mokama. Boye, tozongisi—tozongisi matondi. Mpe Nzambe ápambola bino!

⁵ Sikawa, soki ozalaka na losambo moko te, epai ozalaka, tobengisi yo óya kosangana ná biso awa. Bóbosana te ete losambo oyo ezali polele. Bisó tozali na denomination te, mpe nazali kolikia mpe natii motema ete ekotikáláká kókóma denomination te. Ezali kaka bosangani ya bondeko moko epai wapi mibali ná basi, bilenge mibali ná bilenge basi, bakutanaka zinga-zinga na mésa ya Nzambe, mpo na kozala na bondeko zinga-zinga na Liloba, mpe tozalaka na makambo nyonso na ndenge moko.

⁶ Sikawa, tozali na mokengeli moko ya malamú mingi, moto na Nzambe ya solosolo, mpe nazongisaka matondi mingi mpo

na yango. Soki boyebi lisusu, emoniseli moko, eleki mobu moko, ete Bilei ezalaki kobombisama na esika oyo. Mpe ezali mpenza bongo. Tozali . . .

⁷ Tobongisi sikawa esika yango, ya malamumu, mpo na bakelasi ya Ecodim, ya bato ya mibu nyonso, mpe tozongisi matondi mingi mpenza mpo na libaku malamumu oyo. Bato moko balobaki, na ntango moko boye, soki bakokaki kosala bakelasi ya Ecodim, epai wapi bakokaki kotinda bana na bango. Sikawa, bino, bazali na yango sikawa. Boye, sikawa, boye, bóyaka kosangana ná biso, soki bozali na losambo moko te, esika bozalaka.

⁸ Na ntembe te, soki ozali na losambo ya malamumu, oyo okendeke, epai bateyaka Nsango malamumu, ná nyonso wana, ee, ezali—ezali kaka etonga na biso mosusu, bomoni, esika mosusu. Kasi soki ozali na esika te okendeke, mpe ozali . . .

⁹ Nasosoli ete bato mingi bauti na bitúka mosusu ya ekólo, bayei kofanda awa, mpo losambo oyo ékóma losambo na bango. Na ntembe te, totombeli bino boyei malamumu awa, na Liloba ya Nkolo. Mpe nayebi lisusu, nabanzi, ntango nakendeke, nayebisaki bino ete—ete mayangani, na oyo ngai nayebi, ekobanda kosalema awa na tabernacle.

¹⁰ Nayebi naino te oyo Nkolo abombeli ngai na mikolo ekoya. Natiki yango na loboko na Ye, na endimandima moko boye te to soko eloko nini. Nazelaka kaka, mokolo na mokolo, ete Ye ákamba ngai epai wapi nakoki kosalela Ye malamumu koleka. Mpe ntango Akosilisa ná ngai, na bongo natii motema ete Akoyamba ngai na Ndako, na kimia.

¹¹ Sikawa, nazongisi matondi mingi mpo na boyokani ya bato ya tabernacle. Ndenge Billy azalaki koyebisa ngai na mpóso oyo, nakanisi, ete mabota nyonso oyo etalisami awa, mpe ezalaka zinga-zinga na tabernacle oyo, eyambi moto moko epai na bango. Bofungolaki bikuke, bandako na bisika na bino, mpe bakambti bato oyo bazalaki na bisika ya kokende te. Sikawa, wana ezali mpenza misala ya Boklisto. Mpe na bandako mosusu, batiaki bato na bisika nyonso oyo bakokaki kotia bango, mpo na kopesa bato esika ya kofanda.

¹² Mpamba te, oyo ezali ntango moko ya mpasi mingi, mpo na likambo oyo, likambo ya boye, oyo ezalaki kosalema, na ntina na bato ya masano, mwa lokola basket-ball to eloko moko bongo, mpe—mpe bato basilaki kobómbisa bisika ya kofanda. Lisusu, bato mingi bauti na . . .

¹³ Nakanisi ete baoyo batalisami awa na mwa losambo oyo, pene na bitúka ntuku mibale na mwambe to ntuku misato etalisami awa na losambo, longola bikólo mibale ya bapaya, boye, ná mwa liyangani ya kolamuka oyo. Boye, yango moko eséngaka ete tóbakisa bisika ya kofanda. Koyeba . . .

¹⁴ Lelo nazalaki kotuna na bato moko nazalaki elongo na bango. Nalobaki: “Nasósolaki ete bato ya Jeffersonville bazalaki mingi te awa, na liyangani.”

¹⁵ Moto moko atombolaki mongongo, alobaki: “Tozokoka kokota te.” Ee, yango, yango nde ezalaki likambo. Yango nde ntina. Baike ya ba-policier, ná bato bamosusu, balingaki koya na liyangani, kasi balobaki, bazalaki kolobela yango, balobaki, kasi bayaki mpe bakokaki kokota te, losambo esilaki kotónda meké, liboso kutu bákoka kokóta. Boye, ntango mosusu basalelaki ntango na bango, na nsima, mpe bayaki te. Boye sikawa, bato bazali kouta na bisika mosusu, boye tozongisi matondi mingi.

¹⁶ Sikawa, nayebi te. Likambo oyo ekolanda oyo, ekozala baKelelo Nsambo, na liteya mosusu. Kasi, kati na Bilembo, makambo nyonso, tóloba, ezali na kati. Bileko ya lingomba elandanaki, mpe totiaki yango liboso na esika na yango, ezalaki na motuya—ezalaki na motuya koleka, kasi. . . na ntango yango. Sikawa, bofungwami ya Bilembo etalisi epai wapi Lingomba ezali kokende, mpe ndenge Ekosuka. Sikawa, nakanisi ete Tata na Likoló azalaki mpenza malamumu epai na biso, mpo na kotika biso komona oyo tozali na yango.

¹⁷ Mpe nakoloba boye, na kotaláká mikanda ya kala, oyo nasálelaká mpo na koteya, eleki mibu ebele, nazalaki kaka koya awa, mpe kolobáká oyo nazalaki kokanisa ete ezalaki malamumu, mpe kokóba bongo. Ezalaki mpenza libanda na nzela. Sikawa, Bilembo nyonso minei, nateyaki yango na liteya ya miníti ntuku minei, nyonso minei. Babuti-mpunda minei ya Emoniseli, nasangisaki yango nyonso esika moko mpe nalobaki: “Mpunda moko ya mpembe ebimaki,” nalobaki, “ntango mosusu ezali e—e—eleko ya liboso. Mpe mpunda ya mibale oyo ebimaki ezalaki nzala,” mpe nakóbaki ndenge wana. Kasi, oh, la la, ntango Liloba efungwámaki mpenza, Ezalaki mosika na yango ba-kilometre nkama.

¹⁸ Boye, esengami na biso kosénzela mpe kozela. Mpe ntango mosusu esengelaki kosalema nde na ntango oyo. Ntango mosusu makambo mingi oyo elobami, oyo ntango mosusu ekokaki kosepelisa bato mosusu te. Kasi nandimi ete wana ntango monene ya nsuka ya likambo ekoya, mpe tokokutana ná Nkolo na biso, bokomona ete Ezalaki ya solo. Iyo, mesie. E—E—Ezali mpenza yango.

¹⁹ Sikawa, bato oyo baúti libanda na engumba oyo, longwa na bisika ndenge na ndenge ya zinga-zinga, kouta na bitúka ná bikólo ndenge na ndenge, nasepeli mingi na bosembo na bino, kotambola ntáka molai nyonso oyo, ná ndenge bozui ntango na bino ya lóyi. Mpe bamosusu kati na bango bazángaki ata esika ya kofanda! Na—nayebi, mpo nazuaki makoki ya kosunga bamosusu kati na bango mpo bázua bisika ya kofanda. Bazángaki ata mbongo mpo na kolia, to eloko mosusu, na

bongo...kasi bayei, ata bongo, kozeláká ete likambo moko ésalema mpo na kokiye makambo yango. Mpe ná kondima monene ya lolenge wana, ata soko basengeli kozanga bilei, to esika ya kofanda, balingi koya koyoka makambo yango kosalema, ata bongo. Yango nde kozala na mpiko mpenza, boyebi. Mpe bato nyonso bazali mpenza na mpiko, mokama likoló na mokama!

²⁰ Nakutanaki na semeki na ngai ya mobali kuna, oyo azalaki mo—mo...azalaki kotia ba-briki ya losambo, mpe nyonso wana. Mpe nazalaki koyebisa ye ndenge nasepelaki na mosala na ye. Ngai nazali motongi-ndako ya—ya ba-briki te, to nayebi eloko moko te na ntina na yango. Kasi nayebi oyo litúmu ya angle droit ezali, soki esalemi na ndenge oyo esengeli.

²¹ Mpe alobaki: “Nakoyebisa yo.” Alobaki: “Etikálá kozala na ntango moko ya lolenge wana te, tóloba, oyo otikálá komona boyokani ya boye kati na bato, ntango bango nyonso bazali kosala elongo.”

²² Ndeko Wood, Ndeko Roberson, mpe moto na moto azalaki na esika na ye, makambo nyonso. Mpe ndeko oyo—oyo atiaki biyokeli, mo...nalingi koloba biloko oyo ebimisaka mongongo ná nyonso wana, na kati ya losambo. Balobaki: “Nyonso esalemaki mpenza malamú.” Ntango basengelaki na eloko moko, moto yango azalaki wana mpo na kosala yango. Boye ezali... Nzambe azali kati na mwango yango mobimba. Tozongisi matondi mpenza mpo na yango.

²³ Bato mingi ya losambo bapesaki mbongo, mpo na kosunga yango, ndakisa, Ndeko na biso Dauch ná Ndeko mwasi Dauch, oyo bafandi awa, ná bamosusu mingi oyo bapesaki mbongo mingi mpo na ntina oyo. Mpe nakanisi ete sikawa, batikali na nyongo ata moke te, mpe nyonso esili kofutama. Na bongo, tozongisi matondi mingi mpo na yango.

²⁴ Bóbosana te, ezali losambo na yo, mpo ozali mosali ya Klisto. Mpe yango nde ntina oyo etongámi awa, mpo ézala ekuke ya polele, mpo na kosala basali, ná basali oyo basili kozala basali ya Klisto, ete báýá kosepela zinga-zinga na boyokani na bondeko ya Yesu Klisto. Mpe tolingi ete bóyeba ete moto nyonso akoki koya.

²⁵ Sikawa, ntango boyókaka ngai mbala na mbala, na nsé ya epakweli, kopámela bibongiseli makasi mpenza, na—nalobaka bongo te mpo na kotelemela mokengeli na bino, to kotelemela ndeko mobali moko to ndeko mwasi moko, na kati ya losambo. Mpamba te, nsima na nyonso, Nzambe azali na bato na bibongiseli nyonso. Kasi Ayambaka bibongiseli te; Ayambaka nde moto na moto oyo azali na kati ya ebongiseli. Mpe e... Ezali likambo ya ebongiseli te.

²⁶ Yango wana, ntango bato bakangami mpenza zinga-zinga na bibongiseli, na ntango wana bakoki komona eloko mosusu te, bobele oyo lingomba yango elobi, bomoni. Mpe ebúkaka

boyokani ya bondeko ná bamosusu, mpe ezali système oyo Nzambe asepelaka na yango te, mpe ezali likambo ya mokili, oyo etikálá kobongísama na Nzambe te.

²⁷ Boye, sikawa, nazali kolobela moto moko te. Ézala Ba-katoliko, Bayuda, ekoki kozala ata nani, to—to ba-Metodiste, ba-Batiste, ba-Presbytérien, ata ebongiseli nini, bibongiseli te, mpe—mpe ba-denomination te, bango nyonso, Nzambe azali na bana na Ye kuna. Bomoni? Mpe mbala mingi nandimaka ete bazali kuna na ntina, mpo na kopesa Pole, kobimisa baoyo babongisámá liboso longwa na bisika nyonso wana. Mpe—mpe na mokolo monene wana nde tokomona, Lingomba ya Nkolo Yesu Klisto ekobengama na—na ntango ya koyangana monene na mipepe, mpe biso nyonso tokomata mpo na kokutana na Ye. Mpe nazali—nazali mpenza kozela ngonga yango.

Sikawa, makambo mingi ekokaki kolobama!

²⁸ Mpe na mpokwa oyo, lokola ezali mpokwa ya nsuka mpenza, na momesano, bato nyonso bazali . . . Na liyangani ya kobondela mpo na babeli, namonaka bato kozela na etingia mpo na makambo minene kosalema na liyangani ya kobondela mpo na babeli, epesaka bango bozito mpe motema likoló-likoló. Na bongo, namoni eloko yango moko na mpokwa oyo, bato nyonso bazali kozela na motema lúkú-luku ya komona ndenge nini . . . Mpe mpokwa moko na moko, ezalaki bongo, mpo na bofungwami ya Bilembo yango.

²⁹ Sikawa nalingi mpenza koloba likambo oyo polele. Mbala nyonso, mbala nyonso oyo Bilembo etiamaki na esika na yango; nyonso oyo natikálá kondima na ntina na Yango, mpe natangá ya bato mosusu, ekesanaki na oyo eyelaki ngai na chambre.

³⁰ Mpe likanisi na ngai, na ntango oyo . . . Ntina oyo nasálaki liyangani ya kobondela mpo na babeli na ntongo oyo, ezali mpo likanisi na ngai ya bomoto ekomi mpenza kokende mosika na lolenge na ngai moko ya kokanisa. Nazali komeka kofanda na kati ya—ya chambre, ná ba-ridó ya kokangama mpe ná mwinda ya kopela. Oyo ezali mokolo ya mwambe. Mpe nakotaki ata na motuka na ngai te, mpo na—mpo na kokende ata esika nini.

³¹ Nasengelaki kokende ná bandeko moko, na ba-banque, mpo na ko-sinié mikanda ná makambo mosusu, mpo na mbongo ná biloko mosusu oyo edéfamaki mpo na losambo oyo. Kasi na—kasi nazongaki mpenza mbala moko, mpe nakendeki semba koyekola.

³² Mpe likambo ya kokamwa ezali ete, ata moto moko te alobaki likambo moko. To, na momesano, babetaka na ekuke, bakóbaka kobéta, mpe bazelaka wana. Ata likambo moko ya ndenge wana esalemaki te. Ezalaki mpenza likambo ya kokamwa.

³³ Nazalaki kolia epai ya Ndeko Wood. Na momesano, esika yango etóndaka na mituka. Mpe bazalaki na bato mwambe to

zomi oyo balingaki koya kofanda epai na bango na eleko oyo, kasi ata moko na bango te ayaki.

³⁴ Na bongo, na ntongo ya lelo, nakobosana ntongo ya lelo ata moke te, ngolu ya Mobikisi na biso mpo na mosali na Ye oyo alembi, ya kolemba mpenza. Wana nautaki koyanola na motuna ya moto moko, mpe, na makanisi na ngai nyonso ya malamumu, nakanisaki ete nasalaki malamumu. Mpe, na mbala moko, ezalaki lokola na—nabótolaki eloko moko na mwana moke, namiyokaki mpenza ete nakweisami, kasi naye baki te soki ezalaki nini. Mpe nakanisaki, ete ntango mosusu lokola nazalaki kosala mbangu mpo na kosala liyangani ya kobondela mpo na babeli, ntango mosusu moto moko azalaki na bokono ya makasi mingi, oyo tosengelaki kobondela mpo na ye mbala moko. Natunaki na losambo. Nsima na miníti moke, emonisamaki. Mpe moto moko alobaki: “Okotángá—okotanga te eteni na yo oyo ekomami?” to eloko moko ya ndenge wana. Na ntango yango, nakamataki mwa lokasa yango mpe natángaki yango lisusu, mpo námona oyo yango elobaki. Natalaki na Buku, mpe ekesanaki na mobimba, motuna oyo nazalaki koyanola. Bomoni?

³⁵ Bótika ete náyebisa bino yango. Ntango Oyo-eleki-Bomoto esalemaka, wana nde likanisi ya Klisto. Okómaka mpenza mosika na makanisi na yo moko, na lolenge ete, kati na likanisi na yo moko, na . . . Yango, yo . . . Ezali te na . . . Bótika te námeke kolimbola yango, mpo nakokoka te. Bomoni? Nakokoka kolimbola yango te. Moto moko te akoki kolimbola yango.

³⁶ Ndenge nini moto yango, elingi koloba Eliya, akokaki kotelema kuna, likoló na ngomba, liboso na Bozali ya Nzambe, mpe kokitisa Móto longwa na likoló, na bongo mbula mpenza nsima na Móto? Mpe na nsima kokanga likoló, mpe mbula enokaki te, mibu misato na sánzá motoba, koya lisusu, mpe kobengisa mbula, na mokolo yango moko! Mpe na nsé ya epakweli yango, lolenge . . . Mpe asangisaki banganganzambe nkama minei mpe abomaki bango; na nsima akimaki na lisobe, kobángáká makasi mpo na bomoi na ye, mpo mwasi moko akánelaki ye. Bomoni? Yezabele, akátaki ndai ete akoboma ye. Nzokande, Akába mpe bango nyonso bazalaki wana, bámonaki Bozali ya Nzambe mpe ekamwiseli monene kosalema. Bomoni, ya ye . . . Molimo esilaki kotika ye. Na lolenge na ye ya kokanisa ya bomoto, ayebaki ndenge ya kokanisa te, bomoni. Akokaki kokanisa mpo na ye moko te.

³⁷ Mpe, bómikanisela, Mwanje alálisaki ye mpongi mpe apémisaki ye. Alamusaki ye, Apesaki ye mwa gató; na nsima Alálisaki ye lisusu, mpe Apemisaki ye; mpe Alamusaki ye, mpe apesaki ye mwa gató lisusu. Mpe toyebi te eloko nini ekómelaki moto yango, na mikolo ntuku minei. Na bongo amíbómbaki na kati ya libulu moko, esika moko boye, mpe Nzambe abéngaki ye.

³⁸ Komeka kolimbola te Oyo-eleki-Bomoto. Okoki kosala

yango te. Bomoni? Eloko bobele moko ya kosala ezali kaka kokóba kokende liboso. Mpe namekaka koloba makambo polele mpenza, kasi kobanda sikawa, nako...Nakanisi nakomeka lisusu ata moke te. Tó bokondima kaka, tó bokondima te. Mpe nazali...Bokomona ntina, nsima na mwa ntango.

Sikawa, namekaka kozala sembo. Nzambe ayebi yango.

³⁹ Mpe motuna wana ya ntongo ya lelo. Nazalaki komeka koyanola na yango na bosembo nyonso oyo nayebi mpenza. Natángaki kaka eteni ya liboso ya molongo yango, mpe ezalaki...elingaki kozala solo te. Kasi Molimo Mosanto asósolaki ete ngai...likanisi na ngai...Bomoni, mikolo mibale to misato ya nsuka, bótala makambo oyo ezali kosalema. Bomoni, na—nabengaki nkama nsambo...“nkóto nsambo,” nkama nsambo. Na ntongo ya lelo, nazalaki komeka, kasi bato bamonaki yango, bomoni, mpe elakisaki ete bozalaki kolandela. Sikawa, likambo mosusu, esika oyo nazalaki komeka koloba “ebengá,” kasi nabengaki yango mwana-mpate; kasi namonaki yango mbala moko. Na bongo awa, likambo mosusu oyo namonaki te, Molimo Mosanto azóngaki nsima mpe abendaki bokebi na ngai na yango.

⁴⁰ Ezali kotatola mbala mibale ete makambo oyo ezali ya solo. Ezali...Nzambe azali kosenzela likoló na yango, mpo na komona ete Ezali ya solo. Ya solo. Alingi kosala bongo. Alingi ete bóyeba ete Ezali Solo.

⁴¹ Azali Ye oyo azali kotinda Yango, mpo, na ntembe te, ezalaki te...Ngai mpe nayekoli makambo mingi likoló na yango, ndenge ezali mpo na bino. Boye tozali...nazali kozongisa matondi mingi mpo na—na—na boyebi, ndenge Nkolo asali ete tóyeba sikawa ngonga oyo tozali kobika kati na yango; bomoni, tozali kobika na ntango ya nsuka mpenza, liboso na bokei ya Lingomba. Sikawa...

⁴² Tozalaki koloba, na bongo, tósenga lisusu mapamboli na Ye likoló na Liloba.

⁴³ Tata na biso na Likoló, mpokwa ya nkembo yango ekomi, ngonga ya nkembo, oyo likambo moko ya monene esalemaki. Ezalaki zinga-zinga na bato. Mpe, Tata, nabondeli ete éyébana na mpokwa oyo, na ntembe ata moke te, na mitema mpe makanisi ya bato, mpo báyeba ete Nzambe azali naino na Ngwende, mpe ete Alingaka bato na Ye kino lelo.

⁴⁴ Mpe ngonga yango ekoki, ngonga oyo mokili ezalaki na mposa makasi ya komona yango, ezali sikawa kobélema, mpamba te ezali kogángá na mposa ya lisiko. Tozali komona makambo nyonso eléngelami mpo na kozongisa yango. Tozali komona ete nyonso eléngelami mpo na komema Lingomba liboso na Bozali ya Klisto. Tozali komona Mwasi na libala ko—kobanda kozua lolenge, kolata elamba ya libala, komilengela. Tozali komona miinda kopela-pela. Toyebi ete tokómi na nsuka.

⁴⁵ Sikawa, Tata na Likoló, wana napusani sikawa mpo na koteya, to kolakisa likambo ya monene mpe ya nguya oyo esalemaki na Nkembo, eleki pene na mibu nkóto mibale, mpe epesamaki na ntoma molingami monene, Yoane. Na mpokwa oyo, tosengeli kolobela Yango. Tika ete Molimo Mosanto ápusana sikawa ná Nguya na Ye ya emoniseli, mpo Ákoka komonisa biso likambo oyo Alingi ete tóyeba, ndenge Asalaki na bampokwa oyo euti koleka. Tomipesi epai na Yo, elongo ná Liloba, na Nkombo na Yesu. Amen.

⁴⁶ Sikawa, bokoki kozua, ntango mosusu, ba-Biblia na bino. Mpe ezali bobele molongo ya mokuse, molongo moko ya Makomi. Kasi, ezali na molongo ya nsuka, ezwami. . . Elembo ya nsuka, kútu.

Sikawa, lobi na mpokwa tolobelaki Elembo ya Motoba.

⁴⁷ Elembo ya Liboso, etalisaki biso motemeli-na-Klisto. Ntango na ye esilaki, mpe tomonaki ndenge abimaki.

⁴⁸ Ndenge Ezàli-na-bomoi oyo atálisamaki, Nguya ya Nzambe oyo ebimaki ná nguya ya motemeli-na-Klisto, mpo na kobundisa yango! Nandimi te ete motuna ekoki kozala na makanisi ya moto moko na ntina na yango.

⁴⁹ Na nsima, tomonaki, mbala moko nsima na yango, ya eleko ya lingomba wana, ete Bizàli-na-bomoi yango ebimaki.

⁵⁰ Toyekolaki yango, tomonaki, tobongolaki likambo yango mobimba kuna, Bizàli-na-bomoi ebimaki lisusu te. Bomoni? Kasi, ezalaki kotalisa, wana ezalaki kopusana, kino na eleko ya Monyoko, nsima na Lingomba kosila kokende.

⁵¹ Ekokanáki mpenza malamú be ná bileko ya lingomba! Namoni iota moko te, likambo moko te oyo ezángaki kokokana malamú be mpenza ná yango, ata na bileko mpe nyonso wana, ná bantango. Bókanisa naino. Yango elakisi ete esengelaki kaka kozala Nzambe mpo na kosala yango. Likanisi ya moto ekokaki kosósola yango te. Sikawa, tomonaki ete yango, mpe, biso. . .

⁵² Nkolo atikaki biso tózua Makomi, Makomi Mosanto, makambo oyo Yesu alobaki ete ekosalema. Tolingaki komona yango ndenge nini? Mpe awa, Ayei komonisa mpe koteya yango na ndenge esengeli mpenza. Liteya na Ye kuna, mpo na koyanola na yango, etalisi polele mpenza Bilembo motoba, kasi Alongolaki oyo ya Nsambo. Bomoni?

⁵³ Boye ntango Bilembo efungwamaki, Nzambe, bótala awa, Alongolaki komonisa ata elembeteli moko te ya Oyo ya Nsambo. Bomoni? Ezali sekelé moko ya kobonga be elongo ná Nzambe. Bótala. Sikawa tokotángana na Biblia, na—na Elembo ya Nsambo. Yango ezwami na Emoniseli, mokapo ya 8.

Wana ekangolaki ye elembo na nsambo, kati na likoló lokito ejalaki te soko ndambo moko ya ntango.

54 Yango nde nyonso oyo tozali na yango mpo na yango. Sikawa tokotala malamamu.

55 Mpe tokomeka kouwela ntango molai te, mpo mingi kati na bino bakokamata nzela lisusu, na mpokwa oyo, kozongáká ndako. Nakanisaki lisusu ete násala liyangani ya kobondela mpo na babeli na ntongo ya lelo, mpo bókoka kokende lobi na ntongo, bokozala na ntina ya kozela te. Mpe sikawa, biso. . .

56 Ngai mpe nasengeli kosala mobembo kino na—na Tucson, na Arizona, epai nafandaka. Yango nde epai na ngai sikawa. Bongo na nsima, na—nazali na mposa ya kozonga awa, soki Nkolo alingi, zingazinga na. . . Libota na ngai ezali na mposa ya kozonga awa mpo na kolekisa mwa mikolo na sánza ya Motoba. Mpe, sikawa, ntango mosusu nakozua libaku ya kokutana ná bino nyonso awa, na liyangani moko na ntango yango.

57 Mayangani na ngai oyo ekolanda, oyo tobongisi, ezali na Albuquerque, na Nouveau-Mexique. Nakanisi ete ekozala na mokolo ya libwa, ya zomi mpe ya zomi na moko. Ngai nakozala kuna mokolo ya minei mpe mokolo ya Mitano Mosantu. Na bongo, nasengelaki kozala kuna mikolo nyonso, kasi nazalaki na manáka misusu, epai wapi nakokaki kokóma kuna te kino na ntango wana, boye nakozua mpokwa ya mokolo ya Minei mpe mpokwa ya mokolo ya Mitano na Alburquerque, na Nouveau-Mexique.

58 Na nsima—na nsima oyo—oyo ekolanda, oyo eyebani, pene na yango, ekoki kozanga kosalema. Tondimisami naino mpenza te. Ekozala mpo názala elongo ná baninga na ngai ya malamamu, e—etonga ya *Koganga Ya Minwi*, na. . . kuna na Southern Pines, na Caroline du Nord.

59 Mpe bazali koyoka ngai na téléphone kuna sikawa, elingi koloba, basili kotinda ba-télégramme, nsango, ná nyonso wana, mpe ekomi mpenza pembeni awa, mpo na etonga mosusu, na Little Rock; ezali bato ya le Nom de Jesus, baoyo nasalaki ná bango mayangani kuna, na eleko ya mói makasi oyo eleki, na Cow Palace. Bakosala likita na bango na Little Rock, na Arkansas. Mpe, kobanda na mobu eleki, balingaki kozala ata na mpokwa moko mpamba. To, balingi ete názala kuna mikolo nyonso, kasi bakomilengela ata mpo na mpokwa moko mpamba. Na bongo, nayeibisaki bango, lokola nayeibi mpenza te oyo nasengeli kosala, nalobaki bakoki kopanza nsango ete “ekoki kosalema.” Bongo bakoyebisa na ntina na yango mwa moke na nsima.

60 Auti kobenga? Ah-ah. Malamamu. Olobi nini? [Ndeko mobali moko alobi: “Hot Spring.”—Mok.] Hot Spring nde? Nazalaki na libunga. [“Mokolo ya ntuku mibale na minei.”] Mokolo ya ntuku mibale na minei ya. . . [“sanza ya Mitano.”] Sanza ya Mitano? [Moto moko alobi: “Mokolo ya ntuku mibale na minei kino mokolo ya ntuku mibale na mwambe ya sanza ya Motoba.”]

Mokolo ya ntuku mibale na minei kino mokolo ya ntuku mibale na mwambe ya sánza ya Motoba. Sikawa liyebisi esili kopesama ete “ekoki kosalema,” elingi koloba, “soki ezali mokano ya Nkolo.” Bomoni? Nako. . .

⁶¹ Bótala ntina oyo nalingaka kosala makambo yango bongo. Bokoyeba yango nsima na mwa ntango, sikawa, bomoni. Ntango nakendeke na esika moko, nasepelaka kotia matámbe na ngai kuna, wana nayebi ete Nzambe alobaki: “Kende kuna.” Boye soki moyini ateleme esika moko boye, nakoloba: “Nayei awa na Nkombo ya Nkolo Yesu. Zóngá nsima!” Bomoni? Bomoni? Bomoni? Mpe o—ondimisami mpenza, esika oteleme, bomoni. Ntango Atindi yo esika moko boye, Akotala likambo na yo. Bomoni? Kasi soki okei, na komekamekáká, na bongo nayebi te; ntango mosusu Akozala wana te. Boye, na—nalingaka kondimisama mpenza na ndenge esengeli. Nasálá makambo mingi oyo Ayebisaki ngai te ete násala, kasi na—nalingaka kondimisama mpenza na ndenge esengeli. Nkolo ápambola bino banso sikawa.

⁶² Sikawa, sikawa tomoni ete, lokola ezali kaka molongo moko, tokosepela kosala likambo moko, mwa moke—mwa moke liboso awa. Bómoni ete topumbwe mokapo ya 7. Mokapo ya 6 esúki na oyo ya Motoba, Elembo ya Motoba. Kasi, katikati na Elembo ya Motoba ná Elembo ya Nsambo, likambo moko ezali kosalema. Bomoni? Mpe ezali mpenza—mpenza kitoko, etiami mpenza na esika oyo esengeli, katikati na mokapo ya 6 ná ya 7. Sikawa bomoni na mokapo ya 7, tomoni, katikati na oyo ya Motoba ná oyo ya Nsambo, ntáka moko ezali wana. Ntáka moko, katikati na mokapo ya 6 ná ya 7 ya Buku ya Emoniseli, mpe katikati na Elembo ya Motoba ná oyo ya Nsambo nde ntáka oyo epesami. Sikawa tolingi kotala yango. Ezali na motuya mingi ete tótala mwa ntango oyo.

⁶³ Sikawa bómikanisela, nsima na mokapo ya 4 ya Emoniseli, Lingomba ekei. Nsima na—na mpunda minei kobima, Lingomba esili kokende. Bomoni? Makambo nyonso oyo esalemaki na Lingomba, esalemaki kino na mokapo ya 4 ya Buku ya Emoniseli. Makambo nyonso oyo esalemaki na misala ya motemeli-na-Klisto, ekendaki kino na mokapo ya 4. Na Elembo ya Minei ya Emoniseli, motemeli-na-Klisto ná Klisto, nde nyonso mibale esukaki. Motemeli-na-Klisto akomi na nsuka ya libebi na ye, ná mampinga na ye; mpe Klisto ayei ná mampinga na Ye.

⁶⁴ Ezali etumba moko ya kala oyo ebandáki kuna kalakala mpenza, liboso na ntango. Na bongo bakómaki. . . Satana ná banje na ye babwakisamaki, na bongo bayaki na mabelé. Mpe etumba yango ebandáki lisusu, mpo Eva abúkaki epekielo oyo ezaláká kobomba ye, nsima ya Liloba na Nzambe. Mpe kobanda na ngonga yango mpenza, Satana alóngaki etumba likoló na Liloba na Nzambe, mpo moko na baoyo ya Ye, oyo ya bolembu

koleka, akweisaki bipekiseló. Mpe lolenge wana mpenza nde alóngaka etumba mbala nyonso, ezalaka mpo moko na baoyo ya Ye akweisaka epekiseló ya Liloba.

⁶⁵ Mpe esalemaki na eleko ya lingomba ya nsuka oyo, na nzela ya système ya ebongiseli. Elingi koloba, lingomba ya solo, ya solosolo, ya bulee, ya Nzambe na bomoi, eboyaki koyamba Liloba, ná mobuti-mpunda moko ya lokuta, mpe etángwisaki lingomba longwa na Liloba kino na biyambweli.

⁶⁶ Sikawa, bato boni bayebi ete lingomba Katoliko ya Roma etongámá likoló na eyambweli? Bandimaka yango? Na ntembe te. Ya solo mpenza. Na ntembe te, bandimaka yango. Esuki wana te. BaKatoliko, na bosolo, ekotungisa bango ata moke te, mpo bayebi yango. Baudi kobakisa moko ya sika, eleki ntango molai te, ete Maria asékwaki. Bozali komikanisela yango, eleki mwa mibu, pene na mibu zomi. Bato boni bazali komikanisela yango? Kuna na zulunale. Ya solo mpenza. Bomoni? Nyonso, “eyambweli” ya sika. Bomoni, mobimba na yango ezali eyambweli, Liloba te. Bomoni?

⁶⁷ Sángó moko, na masoló, kala mingi te, alobaki: “M. Branham,” alobaki, “Nzambe azali kati na lingomba na Ye.”

Nalobaki: “Nzambe azali kati na Liloba na Ye.”

Alobaki: “Tosengeli kowelana te.”

⁶⁸ Nalobaki: “Nazowelana te. Nazoloba bobele likambo moko. Nzambe azali kati na Liloba na Ye. Wana ezali ya solo. ‘Moto nyonso oyo akolongola likambo moko kati na Yango, to akobakisa likambo moko likoló na Yango,’ elobi Liloba.”

⁶⁹ Alobaki: “Ee, Nzambe apesaki . . . Klisto apesaki Lingomba na Ye nguya, mpe ayebisaki bango: nyonso oyo bakokanga na mokili, ekokangama na Likoló; mpe oyo . . .”

Nalobaki: “Wana ezali mpenza Solo.”

⁷⁰ Alobaki: “Tozali na . . . na mobóko ya malako yango, nde tozali na nguya ya kokangola lisumu.”

⁷¹ Mpe nalobaki: “Soki bokosala yango ndenge epesamelaki Lingomba, mpe ndenge bango bazalaki kosala yango, nakondima yango. Soki ezali bongo, mai ezali awa, mpo ‘óbatisama na Nkombo na Yesu Klisto mpo na bolimbisi ya masumu na yo,’ bomoni, ezali te mpo moto moko ayebisi yo ete masumu na yo elimbisami.” Bomoni? Bomoni? Ya solo mpenza.

⁷² Bótala Petelo ná mafungola, na Mokolo ya Pantekote. Bóbosana te, ye moto azali na mafungola oyo bango bazobelaka. Mpe ba—bato balobaki: “Mibali mpe bandeko, tósala nini mpo tókoka kobikisama?”

⁷³ Petelo alobaki: “Bóbongola mitema, moko na moko na bino, bóbatisama na Nkombo na Yesu Klisto” (mpo na nini?) “mpo na bolimbisi ya masumu, nsima na yango, bokozua likabo ya

Molimo Mosanto. Mpo elaka yango ezali mpo na bino, mpe mpo na bana na bino, baoyo bazali mosika, ata baoyo nyonso Nkolo Nzambe na biso akobenga.” Ya solo. Boye, yango ekati likambo mpo na libela. Esili nye. Yango nde ekataki likambo.

⁷⁴ Sikawa, kasi, bomoni, motemeli-na-Klisto akótaki, ndenge tolakisaki yango mpe totalisaki yango. Oyo emoniseli mpenza! Oh la la! Kokanisa ete na mibu nyonso oyo, tosili komona yango komata moke-moke. Mpe yango oyo mpenza polele, mbala moko, YANGO ELOBI NKOLO.

⁷⁵ Sikawa, totala ntáka oyo, katikati na mokapo ya 6 ná ya 7. Sikawa, mokapo ya 7 ya Emoniseli, awa, ezali e—e...emonisi likambo oyo ezali kosalema. Ezali awa te kaka mpamba boye. Etiamaki wana te, na katikati na oyo, mpamba kaka. Bomoni? Ezali awa na ntina, mpe ezali emoniseli oyo ezali komonisa eloko moko. Bótala lolenge yango ezali libombami mpe lolenge ya mathématique yango eyokani mpenza ná Makomi! Bomoni? Ya solo.

⁷⁶ Bondimaka na mathématique ya Nzambe? Soki bondimaka te, bosili mpenza kobunga kati na... Na ntembe te, bokobunga mpenza na Liloba, soki bobandi kotia minei to motoba, to—to eloko moko, libanda na maloba ya mathématique oyo etambolaka na molongo. Na ntembe te, na liyemi na yo, okotia ngombe azali kolia matiti likoló na nzete, esika moko. Na ntembe te, okokende mosika te. Mpamba te, Nzambe asalaka te...Liloba na Ye mobimba étámbolaka mpenza na—na mathématique. Iyo, mesie. Ebongi be, ya kobonga be koleka! Ezali na mokanda mosusu te, oyo ekomami lokola Yango, lokola Yango, oyo ebongi be mpenza na mathématique.

⁷⁷ Sikawa, mo—mokapo ya 8 emonisi kaka likambo ya—likambo ya Elembo ya Nsambo, epai wapi eloko mosusu te emonisami, sikawa, eloko moko te. Emonisami te, na Elembo ya Nsambo...sikawa, etali ata moke te mokapo ya 7 ya—ya Emoniseli. Komonisama na Yango, ya Elembo ya Nsambo ezangi mpenza lokito. Mpe soki nazalaki kaka na ntango... Nakomeka na bisika mosusu, kolakisa bino yango.

⁷⁸ Uta na ebandeli, na Genese, mokapo oyo ya Nsamb... to Elembo ya Nsambo oyo ezali—ezali—elobelami. Longwa ebandeli mpenza, na Genese, Elembo oyo Nsamb... .

⁷⁹ Bilembo oyo ezalaki komata se komata. Bozoyeba lisusu te, na ntongo ya lelo, totalisaki ndenge makambo yango elandanaki? Mpe bótala malamumu, na mpokwa oyo, tokotalisa bolandani yango. Bokomona, ntango ekómi na Elembo oyo ya Nsambo, bolandani yango ekatani. [Ndeko Branham alelisi misapi na ye—Mok.] Iyo.

⁸⁰ Yesu Klisto Ye moko mpenza alobelaki ntango ya nsuka. Mpe ntango Akómaki...Alobelaki Bilembo nyonso motoba. Ntango

Akómaki na oyo ya Nsambo, Atelemaki. Ezali yango mpenza, bomoni. Ezali likambo moko ya monene.

⁸¹ Sikawa, sikawa, tokolobela awa sikawa mokapo oyo ya 7, kaka miniti moko, mpo na ko—kokútanisa yango, Elembo ya Motoba ná oyo ya Nsambo. Mpamba te, kaka yango nde tozali na yango, mpo na kosunga biso, sikawa, ezali Elembo ya Motoba...katikati na Elembo ya Motoba ná oyo ya Nsambo, ezali kobengama ya Yisraele.

⁸² Sikawa, nazali na baninga malamú mingi ya ba-Témoin de Jéhovah, oyo bafandi awa, nde nyonso...to oyo bazaláká. Ntango mosusu bamosusu na bango bazali naino ba-Témoin de Jéhovah. Kasi bango balobaka ntango nyonso, M. Russell nde alobáká, ete bato nkóto mokama na ntuku minei na minei wana, ezali Mwasi na libala ya Klisto oyo ya kokamwa. Bomoni? Bango...Ezali bongo te.

⁸³ Ezali na eloko moko te ya kosala ná eleko ya lingomba, ata moke te. Bazali mpenza-mpenza Yisraele. Sikawa, tokotángá yango na mwa miniti moke. Sikawa, ntáká oyo, katikati na Bilembo...ya Motoba, ezali kobéngama mpe kotiamá elembo ya Bayuda nkoto mokama na ntuku minei na minei, oyo babéngami na eleko ya Monyoko, nsima na Lingomba kokende. Bomoni? Etali ata moke te eleko ya lingomba, ata moke te. Oh, bakobéngama, mpe eyokani malamú be mpenza ná Makomi. Mpóso misato na ndambo ya nsuka ya Daniele, epesamaki na “bato” ya Daniele, bomoni, na bato ya Mabota te. Na “bato” ya Daniele, mpe Daniele azalaki Moyuda!

⁸⁴ Sikawa bótala, Yisraele, Yisraele bandimelaka bobele basakoli na bango, mpe, nsima na bango kotátolama.

⁸⁵ Mpe ata esika moko te, na bileko ya lingomba, uta na Lingomba ya ebandeli, ya bantoma, lingomba ya ba-Protestant etikálá kozala na mosakoli. Bóyebisa ngai ezalaki nani, bólakisa ngai yango. Ata mokolo moko te! Bazalaki na moko, na ebandeli ya eleko ya bantoma, nkombo na ye ezalaki Agabus, azalaki mosakoli moko atitolami. Kasi na...Ntango bato ya Mabota bakotaki, kati na libula ya Nzambe, Polo abalukaki epai na bato ya Mabota. Ndenge totángaki yango lobi na mpokwa, nsima na Nkolo koyebisa Petelo, ete “Akopona li—libota moko kati na Mabota, oyo ekozua Nkombo na Ye, Mwasi na Ye ya libala,” boye etikálá kozala te, kokokana na histoire, mosakoli moko kouta na Mabota. Sikawa, bózonga na histoire mobimba, bokomona. Mpo na nini? Na ntembe te, ekokesana na Liloba. Na ntembe te.

⁸⁶ Ntango oyo ya liboso abimaki, ezalaki nkosi, wana *ezalaki* basakoli: Liloba.

Ya mibale oyo abimaki, ezalaki mosala, mbeka.

Ya misato oyo abimaki, ezalaki mayele ya—ya moto.

⁸⁷ Kasi tozali na elaka, ete na mokolo ya nsuka, ete ekozonga lisusu na Lingomba, mpo na ntina ya kosembola nyonso oyo etéyamaki mabe, oyo ezángaki, oyo esálemaki te, oyo etiolamaki. Mpamba te, elobamaki liboso awa ete Nsango ya mwanje ya nsambo ekosilisa mabombami ya Nzambe. Na bongo, toyekolaki Yango nyonso. Tomoni ete Ezali mpenza na boyokani be ná Makomi. Yango nde ntina.

⁸⁸ Sikawa, bokoki kokanisa, ntango moto oyo akokota na mosala? Ntango akosala yango, bóbosana te, ekozala mpenza na komikitisa ná nyonso wana, na lolenge ete mangomba ekoleka mpenza mosika na yango. Mpe bokoki kokanisa, ete mangomba oyo ezali naino na nsé ya mimesano ya ba-réformateur ekoyamba mosakoli oyo Nzambe atindi, oyo akotelemela mpenza malakisi mpe bibongiseli na bango?

⁸⁹ Sikawa, ezali bobele na moto moko oyo akoki kokokisa yango, bobele Molimo moko oyo ezalá na mokili, oyo ngai nayebi. Ekozala to... Ekosengela kozala Eliya, na ntango na ye. Mpe esílá kolobama liboso ete ekosalema, ezali eloko mosusu te bobele Molimo ya Klisto.

⁹⁰ Ntango Klisto ayaki, Azalaki litondi. Azalaki Mosakoli. Azalaki Nzambe ya—ya basakoli. Bomoni? Bomoni?

⁹¹ Klisto, bótala ndenge bayinaki Ye. Kasi Ayaki mpenza ndenge Liloba elobáká ete Alingaki koya. Kasi lokola Azalaki Mosakoli, batúkaki mpe bango moko batángwaki mosika na Bokonzi na Nzambe, babengaki Molimo ya Nzambe, oyo ezalaki kososola makanisi mpe bongo na bongo, “molimo ya mbindo.” Balobaki “Azalaki mo—ete azalaki moto na solóka, to molimo mabe,” yango mpenza.

⁹² Moto na soloka azali molimo mabe, bomoni, molimo ya zabolo. Solo mpenza. Boyebaki yango? Na ntembe te. Kosala kisoloka ezali komekola mosakoli, mpe yango ezali mpenza kotuka, na miso ya Nzambe.

⁹³ Sikawa bótala. Babéngamaki, na boyokani mpenza be ná Makomi, ya mibu misato na ndambo ya nsuka ya Daniele.

⁹⁴ Bótala, eyebisamaki na mondimi—bandimi ya Yisraele, na Kondimana na Kala, ete bándimelaka kaka basakoli na bango, nsima na mosakoli yango kotátolama. “Soki moko kati na bino azali moto ya molimo to mosakoli, Ngai Yawe, Nga-... Nzambe na yo, Ngai moko Nakomimonisa epai na ye, mpe Nakosolola ná ye na bimononeli, na nzela na bandoto mpe ndimbola ya bandoto.” Soki moto moko alóti ndoto, mosakoli akozala na makoki ya kolimbola yango. Mpe soki—soki azwi emononeli, akoloba yango. “Nakomimonisa Ngai moko epai na ye na nzela na bimononeli mpe bandoto, komimonisa Ngai moko. Mpe soki oyo ye alobi ekokisami, na bongo, bóyoka mosakoli yango, mpo Nazali elongo ná ye. Soki te, na bongo, bóbanga ye ata moke

te.” Iyo. Ya solo. “Bókende mosika, bótika ye, bomoni.” Sikawa ezali...

⁹⁵ Sikawa, Yisraele ekondima yango ntango nyonso. Mpe bozali komona, boye te? Mpo na nini?

Sikawa nalingi ete bósimba liteya oyo malamumu, na mpokwa oyo, sikawa.

⁹⁶ Mpo na nini? Mpo, ezali motindo oyo Nzambe apésá bango. Ata bato ya Mabota bakaboli mikanda boni kuna mpe batindi yango mpe bapanzipanzi yango. Ata otamboli na Yisraele mobimba ndenge nini, ná Biblia na nsá ya lipeka, mpo na kotalisa polele likambo oyo, to *oyo wana*, to *oyo mosusu boye*; bakotikáláká koyamba eloko moko te bobeke mosakoli. Ezali mpenza bongo. Mpamba te, bobeke mosakoli nde akoki kozua Liloba na Nzambe mpo na kotia Yango na esika na Yango, mpe kozala mosakoli oyo atatolami. Bakondima yango. Ya solo.

⁹⁷ Nazalaki kosolola ná Moyuda moko awa na Benton Harbor, ntango John Rhyn, oyo azalaki na miso ekufá pene na bomoi na ye mobimba, amonaki. Bamemaki ngai kuna, na ndako ya Dawidi. Mpe rabi yango ayaki wana, azalaki na mandefu ya milai. Alobaki: “Ofungolaki miso ya John Rhyn na bokonzi nini?”

Nalobaki: “Na Nkombo na Yesu Klisto, Mwana na Nzambe.”

⁹⁸ Alobaki: “Mosika na ngai, likanisi ya koloba ete Nzambe azalaka na Mwana!” Bomoni? Mpe alobaki: “Bino bokoki kokáta Nzambe na biteni misato te, mpe kopesa Ye na Moyuda. Bokómisaka Ye Nzambe misato; bozali mpenza bapakano!”

⁹⁹ Nalobaki: “Nazokáta Ye na biteni misato te.” Nalobaki: “Rabi, ekozala mpenza likambo ya kokamwa mpo na yo kondima ete moko na basakoli na bino alobaki bongo...likambo ya lokuta?”

Alobaki: “Basakoli na biso balobaka likambo ya lokuta te.”

Nalobaki: “Nani oyo Yisaya 9:6 azalaki kolobela?”

Alobaki: “Masiya.”

¹⁰⁰ Nalobaki: “Boye, Masiya akozala Mosakoli-Moto. Boye te?”

Alobaki: “Iyo, misie. Ya solo.”

¹⁰¹ Nalobaki: “Lakisa ngai epai wapi Yesu azangaki kokokana na yango.” Alobaki...Nalobaki: “Boyokani nini Mosakoli-Masiya akozala na yango na Nzambe?”

Alobaki: “Akozala Nzambe.”

Nalobaki: “Ya solo. Sikawa, osili koyamba yango.”

¹⁰² Ya solo mpenza, Moyuda yango atelemaki wana ná mpisoli kokitáká ye na matáma, alobaki: “Nakoyoka yo mokolo mosusu.”

Nalobaki: “Rabi, ondimi yango?”

¹⁰³ Mpe alobaki: “Tala,” alobaki, “‘Nzambe azali na makoki ya kotelemisa bana mpo na Abraham longwa na mabanga oyo.’” Nayebaki ete azalaki kolobela Kondimana na Sika.

Nalobaki: “Ya solo, Rabi! Sikawa olobi nini mpo na yango?”

¹⁰⁴ Alobaki: “Soki natei yango, nakozala kuna,” boyebi ete esika na bango ezalaka kuna, likoló na ngomba, “kuna na balabala, nakobanda kosenga-senga lipa.”

¹⁰⁵ Nalobaki: “Ekozala malamumu koleka ete názala kuna, koséngáka-séngáka lipa.” Moyuda alandaka mbongo kino lelo, boyebi. Bomoni? Bomoni? “Malamu...” Mpe nkombu na ye ékomama na wólo, likoló na... Nalobaki: “Malamu ete názala kuna, koliáká ba-biscuit ya múngwa mpe komeláká mai ya pómpi, mpe koyeba ete nazali na boyokani ná Nzambe, mpe na bosembo; na esika ya kozala awa mpe bákoma nkombu na ngai na etutu ya ndako yango, na nkómá ya wolo ndenge wana, bongo nayebi ete nazali mosika na Nzambe. Nayebi yango.” Alingaki lisusu koyoka ngai te, na bongo akotaki.

¹⁰⁶ Kasi ezali bongo. Bokoki kokata Nzambe na biteni mibale to misato te, ábengama “Tata, Mwana mpe Molimo Mosanto,” mpe kosala baNzambe misato, mpe kopesa yango na Moyuda. Mobeko na Ye mpenza ezali: “Okozala na banzambe mosusu te liboso na Ngai. Nazali Yawe Nzambe na yo.” Yesu alobaki eloko nini? Yesu alobaki: “Yoka, E Yisraele, Nazali Yawe Nzambe na yo, Nzambe bobele moko.” Misato te; okopesáká oyo wana epai na bango te. Te. Mosakoli moko te akotikáláká kolobela baNzambe misato. Te. Esika moko te. Okoyoka yango ata mokolo moko te. Te, mesie. Ezali bopakano mpe makambo ya bapakano, nde epai wapi eútelá. Iyo, mesie.

¹⁰⁷ Botala. Kasi basakoli oyo bakoya. Esuki kaka wana te... Ba—basakoli yango, sikawa, ezali Emoniseli 11. Totángaki ndambo na yango. Mpe nalingi ete bótánga yango wana bokoyekola yango, na ba-bande mpe bongo na bongo. Bazali mpenza basakoli oyo batatolami, na elembo ya basakoli. Na bongo nde Yisraele akoyoka yango.

¹⁰⁸ Sikawa, mpo na bino, baninga na ngai ba-Témoin ya Jehovah, bósosola sikawa ete bato nkóto mokama na ntuku minei na minei, ezali Mwasi na libala ata moke te. Likomi ata moko te ezali mpo na kotátola yango. Te, mesie. Ezali bongo te. Bazali Bayuda. Ezali Baponami oyo babengami na ntango ya mibu misato na ndambo ya nsuka na mpóso ntuku nsambo ya Daniele. Sikawa ezali...

¹⁰⁹ Na—nazali kokoba kolobela likambo oyo. Ezali mpenza te mpo na bino nyonso oyo bozali awa, kasi, bomoni, bato, ba-bande oyo ekendeke bisika ndenge na ndenge, bomoni. Mpe bozali kososola yango. Boyókaka ngai kozongela koloba yango. Ezali na ntina wana.

¹¹⁰ Bótala. Sikawa, bomoni ete basengelaki kobomama miso, bomoni ndenge bazalaki...? Yesu, to, Nzambe asengelaki koboma Bayuda miso, mpo báyebe Yesu te. Soki báyébaka, soki báyebaka bobele ete wana... Komona elembo oyo Atalisaki, soki bázalaka na lolenge na bango ya malamumu, ndenge bazaláká na ntango ya mobeko, ntango Nzambe apesáká bango motindo yango na ntina na mosakoli, mpe bámonaka Yesu kotalisa yango, balingaki koloba: “Oyo nde Masiya.” Mpo na nini esalemaki bongo?

¹¹¹ Baoyo na eleko wana, baoyo bankombo na bango ekomámáka na Buku ya Bomoi ya Mwana mpate, bantoma na Ye ná bamosusu, bamonaki yango mpe bayebaki yango.

¹¹² Mpo na nini baoyo mosusu te? Bomoni, babomamaki miso. Bakokaki komona yango te. Bazomona yango naino te. Mpe bakomona yango te, kino mokolo ekobotama lokola ekólo, na mbala moko. Yango ekoki te...

¹¹³ Liloba ekoki kokweya te. Bóbosana te, Liloba ekoki kokweya te. Ata otuntuki boni boni, ná nyonso oyo esálemaka, ata bongo, Liloba yango ekoki kokweya te. Ekosalema mpenza ndenge Nzambe alobaki ete ekosalema. Bomoni? Sikawa, tososoli ete makambo yango esengeli kosalema.

¹¹⁴ Yango wana bayebaki Yesu te, na ntango oyo Amitalisaki mpenza Ye moko polele ete Azali Mosakoli.

¹¹⁵ Ata elenge—elenge mwasi ya Mosamaliya, oyo azalaki kuna, na libulu ya mai. Ye atikaláká kokóma na Samaliya te; Akendeki kuna, Alobaki ete Asengelaki kolekela na nzela wana, mpe Akendeki kuna. Mpe mwasi yango azalaki kuna. Mpe ye, na lolenge na ye, azalaki na lolenge ya malamumu mpo na koyamba Nsango-malamumu, koleka banganganzambe ya basambeli wana ná bamosusu ya eleko wana. Asalaki yango. Na ntembe te. Sikawa, bomoni?

¹¹⁶ Kasi, kati na koboyama nyonso ya bango, kasi moko na bato minene na bango andimisamaki ete bayebaki ete Azalaki Molakisi oyo Nzambe atindaki.

¹¹⁷ Nazalaki kosolola ná moko na minganga ya malamumu koleka na bituka ya sudi, na biró na ye, eleki ntango molai te. Spécialiste moko ya malamumu mpenza na Louisville, mobali moko ya mpiko mpenza. Nalobaki na ye, nalobaki: “Monganga, nalingi kotuna yo motuna moko.”

Alobaki: “Malamumu.”

¹¹⁸ Nalobaki: “Natálaki elembo na bino minganga, língénda. Botiaka nyoka moko ezingi likonzi. Elakisaka nini?”

Alobaki: “Nayebi te.”

¹¹⁹ Nalobaki: “Elakisaka boye: ezalaki elembo ya lobiko na nzoto uta na Nzambe, ntango Mose atómbolaki nyoka ya motako

na lisobe, bomoni, yango ezalaki bobele elembo, bobele elembo ya Klisto ya solo.”

¹²⁰ Sikawa, lelo, médecine ekómi elembo ya lobiko na nzoto uta na Nzambe. Ata mingi na bango bandimaka yango te, minganga ya malamu, ya solosolo, bandimaka yango. Kasi bamosusu na bango bandimaka yango te. Kasi elembo mpenza, oyo batómbolaka, étátolaka na ntina na Nguya ya Nzambe na-Nguya-nyonso, bálinga kondima yango to te. Bomoni? Ya solo. Na elembo ya minganga, ezalaka na nyoka ya motáko na likonzi moko.

¹²¹ Sikawa, bótala Bayuda oyo. Sikawa, mpese ezalaki kozipa miso ya bato yango. Bango bakokaki kosala ndenge mosusu te; ezalaki wana, mpe Nzambe nde atiaki yango wana. Mpe ekozala wana kino na eleko oyo elakamaki, ntango basakoli yango bakoya. Bokoki kotinda ba-misionére, bokoki kosala nyonso oyo bolingi; Yisraele ekobongwana ata moke te, kino basakoli yango bakokóta na mosala, mpe yango ekosalema nsima na Konétolama ya Lingomba ya Mabota.

¹²² Kaka ndenge eleko ya ngombe ekokaki koyamba mbéla ya nkosi te, mpo Nzambe alobaki na Liloba na Ye ete molimo ya ngombe nde ebimaki. Mpe na eleko ya ba-reformateur, moto nde abimaki. Bomoni? Bino. . .

¹²³ Yango nde eloko bobele moko oyo bino. . . bango bakoki koyamba. Ezali. . . Mpe, kuna sikawa, basili kobomama miso. Esili na yango mpenza wana. Sikawa bótala.

¹²⁴ Kasi eleko moko ekoya, ntango eleko ya bato ya Mabota ekokóma na nsuka. Nzete moko ezali, oyo misisa na yango ezalaki ya Bayuda, mpe ekátamaki; mpe babambáki Mabota kati na yango, “nzete ya mowiti ya zámbe,” mpe ezali kobota mbuma na yango. Sikawa, ntango bakokáta Mwasi na libala ya Mabota, nzete ya Mwasi na libala oyo nalobelaki, mpe Akomemama kino liboso na Bozali ya Nzambe; Nzambe akosilisa nye bato ya Mabota oyo bandimi te, na ngámbo oyo (mwasi mongondo oyo aláli mpongi), mpe yango ekobambama lisusu. Alakáki kosala yango.

¹²⁵ Kasi kino na ntango yango, osengeli kaka koyeba esika ozali. . . Soki oyebi esika oyo ozali kokende, ee, malamu. Soki oyebi te, ee, ozali kotenga-tenga na kati ya molili.

¹²⁶ Sikawa, na ntango yango nde Bayuda bakobóngwana, na eleko yango. Sikawa, lokola eleko ya lingomba, na nsé ya nguya ya elaka oyo epakolami, bakoyamba Klisto; kasi, sikawa, ekosalema te, wana bato ya Mabota bazali naino wana. Sikawa tokoki komona lolenge ya nsango oyo basakoli mibale oyo ya Emoniseli mokapo ya 11 bakoteya. Sikawa bokoki komona polele mpenza likambo oyo bango bakosala. Mpamba te, baoyo bakotikala, to bato nkóto mokama na ntuku minei na minei oyo basílá kobongisama liboso, bakoyamba Elembo ya Nzambe.

127 Tótanga yango. Sikawa bóyoka na bokebi mpenza sikawa. Sikawa nalingi ete bótanga elongo na ngai, soki bokokoka, mpo nakozongela kolobela yango, kala mingi te, mokapo ya 7, sikawa, oyo ezali na katikati ya Elembo ya Motóba ná ya Nsambo.

*. . . nsima na makambo oyo—nsima na makambo oyo
(Bilembo yango) . . .*

128 Elembo ya Motoba ekangolamaki, mpe ezali eleko ya Monyoko. Moto nyonso asósoli yango sikawa? [Losambo balobi: “Amen.”—Mok.] Elembo ya Motoba ekangolamaki, mpe Monyoko ebandaki. Nsima na oyo, nini?

*. . . nsima na makambo oyo namonaki banje minei
batemi na nsuka nyonso minei na mokili, kosimba
mipepe minei na mokili, na ntina ete mopepe épepa
likoló na mokili te, soko na mbu te, soko na njete moko
te. (Banje minei!)*

*Namoni mpe mwanje mosusu konétwa uta na ebimelo
na ntango, ajalaki na elembo na Njambe na bomoi: mpe
angángi na mongongo makasi na banje yango minei,
baoyo bajui nguya na kobebisa mbu, mokili. . . mbu,*

*Mpe alobi ete, Bébisa mokili, ná mbu, ná njete te, kino
ekosila biso kotia bilembo na baómbo . . .*

129 Ezali Mwasi na libala te. “Basali.” Bana te. “Basali.” Yisraele bazalaka ntango nyonso basali ya Nzambe. Lingomba nde ezali bana, bomoni, na nzela ya mbótama. Yisraele azali mosali na Ye. Bótala malamau, bisika nyonso, ezalaka ntango nyonso bongo. Abraham azalaki mosali na Ye. Biso tozali basali te. Tozali bana, ya mibali ná ya basi. Iyo.

. . . ya . . . ya Njambe na biso na elongi na bango.

130 Sikawa bótala malamau.

. . . Njambe na biso na elongi na bango.

*Nayókaki motuya na bango oyo basili kotiamama
elembo: . . .*

131 Sikawa nalingi ete bóyoka malamau, wana tozali kotángana bango.

*. . . ejalaki nkóto mokama na ntuku minei na minei,
oyo batiamaki elembo kati na mabota nyonso na bato
na Yisraele.*

132 Atángi bankombo na bango malamau mpenza. Sikawa, soki British-Israel Discerner moko akoki kozala awa, yoka ndenge likambo oyo ekobuka mpenza makanisi na bango, bomoni.

*Bato na libota na Yuda nkóto jomi na mibale.
(Ebengami “libota.”) Bato na libota na Lubene nkóto
jomi na mibale. Na libota na Gáda . . . nkóto jomi na
mibale.*

133 Bólandela malamau—bolanda malamau mabota yango sikawa.

*Mpe bato na libota na Asele nkóto jomi na mibale. . . .
bato na libota na Nafatali nkóto jomi na mibale. . . .bato
na libota na—na Manasé. . . nkóto jomi na mibale.*

*Mpe bato na libota na Simeona. . . nkóto jomi na
mibale batiamaki elembo. Bato na libota na—na Lewi
nkóto jomi na mibale. Bato na libota na Yisakala. . .
nkóto jomi na mibale. (Yisakala, nabanzi botángaka
yango bongo.) . . nkóto jomi na mibale.*

*. . . libota na Zebuluna. . . nkóto jomi na mibale. Mpe
libota na Yosefe bato nkóto jomi na mibale batiamaki
elembo. Na nyonso. . . Bato na libota na Benyamina
nkóto jomi na mibale batiamaki elembo.*

¹³⁴ Sikawa, mabota yango ezali zomi na mibale, nkóto zomi na mibale na libota moko. Zomi na mibale mbala zomi na mibale. . . . epesi boni? [Losambo balobi: “Nkóto mokama na ntuku minei na minei.”—Mok.] Nkóto mokama na ntuku minei na minei. Sikawa bótala malamumu. Bango nyonso bazalaki bato ya mabota ya Yisraele.

¹³⁵ Sikawa bótala malamumu: “Nsima na likambo oyo. . . .” Sikawa, etonga mosusu yango oyo, ezali koya. Sikawa, Mwasi na libala asili kokende, toyebe yango. Kasi bótala malamumu etonga oyo ekoya.

*Na nsima na makambo oyo natalaki, mpe namoni ebele
monene, oyo moto te akoki kotánga motuya na bango,
baúti na mikili yonso, . . . na mabóta yonso, na bibóló
yonso, na monoko yonso, batelemi liboso na ngwende,
mpe liboso na Mwana na mpate, balataki bilamba ya
mpembe, mpe basimbi bitape na mbila na liboko na
bango;*

*Bangáangi na mongóngo makasi ete, Lobiko na Nzambe
na biso oyo afandi na ngwende, mpe epai na Mwana na
mpate.*

*Mpe bikólo yonso. . . batelemaki zinga na zinga na kiti
na bokonji, ná mpaka, ná bijali-na-bomoi yango minei,
mpe bakweyi na bilongo na bango liboso na kiti na
bokonji, kosambela Njambe*

*Ete, Amen: Mapamboli, . . . nkembo, . . . bwanya, . . .
matondi, . . . lokumu, . . . nguya, . . . makási, mpo na
Njambe na biso libela na libela. Amen.*

Moko na bampaka. . .

¹³⁶ Sikawa, azali awa liboso na bampaka. Ndenge tomonaki yango, na kati ya Bilembo nyonso.

*Moko na bampaka alobaki na ngai ete, Baoyo bazali
banani. . .*

137 Sikawa, lokola Yoane azalaki Moyuda, ayebaki bandeko na ye moko. Amonaki bango na lolenge ya mabota. Ezali solo? Ayebaki mpe atángaki nkombo ya bikólo yango moko na moko.

138 Kasi sikawa, ntango amonaki baoyo mosusu, azuaki mwa mobulu. Mpe mpaka ayebaki yango, boye alobaki:

... Baoyo balati bilamba mpembe bajali banani? mpe bauti wapi?

139 Yoane moto azali koyanola sikawa:

Nalobaki na ye ete, Nkolo na ngai, yo oyebi.

140 Yoane ayebaki bango te, bomoni; mabota nyonso, minoko nyonso, mpe bikolo nyonso.

... Alobaki na ngai ete, Bajali baoyo—alobaki na ngai ete, Bazali baoyo babimi na monyoko monene, (na elobeli mosusu, Monyoko monene), basukoli bilamba na bango, ... bayeisi yango mpembe na makila na Mwana na mpate.

Yango wana bazali liboso na kiti na bokonji na Nzambe, mpe bakosalela ye butu ná moi na kati ya tempelo na ye: mpe bango. ... mofandi na kiti na bokonji akofanda elongo ná bango.

Bayokoka lisusu njala te, bakoyoka mpe mposa na mai lisusu te; moi ekongengela bango soko moke te—moi ekobola bango soko moke te, ná molunge makasi mpe te.

Mpo ete Mwana na mpate oyo ajali katikati na kiti na bokonji akoleisa bango, mpe akokamba bango na majiba na mai na bomoi: Nzambe mpe akolongola ... mpisoli yonso na miso na bango.

141 Sikawa tokofungola ... tokomi na Elembo yango.

Bomoni, bazalaki ... Liboso, tobandi sikawa na Yisraele.

142 Na nsima tomoni lingomba oyo epétolami, Mwasi na libala te; lingomba oyo epétolami, na nzela na Monyoko, bomoni, bomoni, awa, akómi, bato mingi mpenza, ya mitema ya sembo, oyo bauti na—na Monyoko monene. Lingomba te; Yango esili kokende, Mwasi na libala. Oyo wana ezali nde lingomba.

143 Sikawa tomoni, mwa moke na nsima, ete Yesu alobaki ete Ngwende ekotiana wana, mpe ndenge ... bango bakoleka na kosambisama, moko na moko.

144 Sikawa, tomoni ete bato oyo batiamaki Elembo ya Nzambe na bomoi (boye te?), Bayuda yango. Elembo ya Nzambe na bomoi ezali nini?

145 Sikawa, nazotanga moto te, nazali koyokisa moto moko te mpasi. Nazali kaka koloba yango, bomoni. Boyebi ete natangi makambo mingi oyo bato na mayele mingi bakomáki na ntina

na yango, balobaka ete etonga oyo awa, oyo basukolamaki na makila, ezalaka mpenza Mwasi na libala?

¹⁴⁶ Boyebaki ete bato ya mayele mingi balobaka mpe ete bato nkóto mokama na ntuku minei na minei bazali Mwasi na libala? Ezali mpenza. . . Eloko moko efandi malamumu te awa. . . efandi mpenza malamumu te awa, mpo eloko moko elóngobani te sikawa.

¹⁴⁷ Bótala, bandeko na biso ba-Adventiste balobaka: ete: “Elembo ya Nzambe ezali kotósa mokolo ya sabáta.” Boyebi yango. Kasi bólakisa ngai eteni moko ya Makomi mpo na yango, mpo na kolakisa ete sabáta, to kotósa mokolo ya sabata nde Elembo ya Nzambe. Bomoni? Ezali kaka moto moko nde abimisaki likanisi yango.

¹⁴⁸ Kasi soki botángi Baefese 4:30, elobi: “Bóyokisa Molimo Mosanto ya Nzambe mawa te, oyo, na nzela na yango, botiami elembo kino mokolo boko. . . ya lisiko na bino,” iyo, mesie, ntango mosala ya kolobela bato ekosila, mpe bokosila koya; Klisto akoya kosikola baoyo ya Ye Moko. Botiami elembo; kino na mayangani ya kolamuka oyo ekolanda te. Ntango otiami elembo na Molimo Mosanto, ezali mosala oyo esili, elakisi ete Nzambe asili koyamba yo, mpe makoki ya kotángwa mosika na yango ezali te.

¹⁴⁹ Okoloba: “Ee, nazaláká na Yango, kasi napéngwáki.” Te, o—ozalákí na yo na Yango te.

¹⁵⁰ Nzambe alobaki ete Ekokóba kino na Mokolo ya Lisiko. Sikawa, ah-ah, wélána nde na Ye, mpo ómona oyo yango elingi koloba. “Kino na Mokolo ya Lisiko na bino.”

¹⁵¹ Bótala. Lokola ezalaki. . . Lokola bazalaki litiká engebene na koponama, Bayuda oyo bazali sikawa litiká engebene na koponama. Na mikolo ya lotomo ya liboso ya Eliya epai na Bayuda, esika oyo loboko na Nzambe etiáká bandimi nkóto nsambo mpembeni, sikawa, ezali na litiká moko na ntango oyo, ntango na bango ebélemi, bakozala nkoto mokama na ntuku minei na minei engebene na koponama. Elingi koloba, Nsango, na ntango yango, bato oyo bakondima Nsango bakozala nkoto mokama na ntuku minei na minei.

¹⁵² Sikawa, bokoloba: “Oh, zela naino, ndeko, nayebaka mpenza te na ntina na likambo ya ‘koponama’ oyo. Ee, natikálá kotanga yango naino te.”

¹⁵³ Malamumu, sikawa tótala soki ezali solo, to te. Tózonga na Matai, mpe tótala yango mpo tóyeba soki tokokoka te komona mwa eloko moko likoló na yango, esika moko. Sikawa, nandimi ete nalobi solo. Nakomaki yango awa te, kasi euti koyela ngai na makanisi. Tózua, na nsuka, molongo ya 30; esika oyo totángaki lobi na mpokwa, nsuka ya Elembo ya Motoba, na molongo ya 30. Sikawa tótanga yango mpe tótala sikawa epai ekomema biso, molongo ya 31. Bomoni? “Bakomona Mwana na moto koya na nkembo.” Sikawa molongo ya 31.

*Akotinda mpe banje na ye ná koyúla makasi ya kelelo,
mpe akoyanganisa baponami na ye longwa na mipepe
minei, longwa na molelo moko na likoló kino molelo
mosusu.*

154 “Baponami” bakobima. Ezali nini? Mpe eleko ya Monyoko. Nzambe akobenga baponami na Ye, oyo wana ezali Bayuda, na ntango yango, baponami. Biblia elobeli yango. Polo alobeli yango: “Engebene na koponama.” Bato nkoto mokama na ntuku minei na minei, engebene na koponama, nde bakondima Nsango, uta na ba-milió na milió oyo bakozala kuna.

155 Ba-milio na bato bazalaki na Palestine, na mikolo ya lisakoli ya Eliya, kasi bato nkóto nsambo nde babikisamaki, uta na ba-milió.

156 Sikawa, “Engebene na koponama.” Epai wapi, ba-milió ya Bayuda bazali kosangana na mabelé na bango. Esili kokóma ekólo. Bakozala ba-milió kuna, kasi bobele “baponami” nkoto mokama na ntuku minei na minei nde bakozuama. Bakoyoka Nsango.

157 Ezali kosalema ndenge moko na Lingomba ya Mabota. Ezali na Mwasi na libala moko, mpe Asili koponama. “Mpe akobengama engebene na koponama.” Bótala, nyonso oyo ezali mpenza etaliseli ya Lingomba, bandimi oyo baponami.

158 Bamosusu bakondima te. Bokoki komona yango. Soki oyebisi moto Solo, ata Liloba etalisi yango polele, mpe na nsima ekokisami; akoloba: “Nandimi Yango te.” Okoki mpenza . . .

159 Kobébisa lisusu ntango mpo na bango te. Yesu alobaki ete tósala yango te. Alobaki: “Ezali mpenza lokola kobwaka pauni liboso na bangulu.” Bomoni? Alobaki: “Bótika bango. Bakobalukela yo mpe bakonyata-nyata yo. Bakotiola yo. Longwa wana mpe tika bango. ‘Soki mokufi miso akambi mokufi miso . . .’”

160 Nakendeki epai ya moto moko, kala mingi te, to, ye nde ayaki epai na ngai. Azalaki kowélana, bipai na bipai, bisika nyonso, kotelemela lobiko na nzoto uta na Nzambe. Mpe ayaki awa, mpe alobaki: “Nandimaka te lobiko na nzoto na yo uta na Nzambe.”

161 Nalobaki: “Oyo ya ngai, nabanzi ete ezali na ntina moko te, mpo nazali na yango te.” Mpe ye . . . Nalobaki: “Kasi oyo ya Nzambe ebongi be.”

Alobaki: “Eloko ya ndenge wana ezalaka na yango te.”

162 Nalobaki: “Olobi yango nsima na ntango, moninga. Iyo, o—ozelaki ntango molai mingi mpo na yango. Okokaki kowelana, eleki mwa mibu, kasi tokómi sikawa na eleko mosusu. Ezali na ba-milió ya bato mpo na kotatola yango, omoni.” Nalobaki: “Osili—osili kolekisa ntango, moninga, mpo na koloba bongo.”

163 Alobaki, alobaki: “Ee, nandimaka yango te; ata osali eloko nini.”

Nalobaki: “Na ntembe te. Okokoka te.” Bomoni?

¹⁶⁴ Alobaki: “Bomá ngai miso!” Alobaki: “Soki ozali mpenza na Molimo Mosanto, lokola Polo,” alobaki, “bomá ngai miso.”

¹⁶⁵ Nalobaki: “Ndenge nini nakoki kosala yango, na ntango oyo osílí kokufa miso?” Nalobaki: “Tata na yo asílá koboma yo miso liboso na Solo.” Nalobaki: “Yo, osílí kokufa miso.”

¹⁶⁶ Mpe alobaki: “Nakondima te; ata okosala eloko nini, ata okoki kotalisa polele ndangá boni, to eloko ya ndenge wana. Nakondima yango kaka te.”

¹⁶⁷ Nalobaki: “Ya solo. Ezalaki mpo na bazángi-kondima te. Ezalaki kaka mpo na bandimi. Ezalí bongo.” Bomoni?

¹⁶⁸ Ezalaki nini? Bomoni, okoyeba na ntango yango mpenza ete koponama ezali wana te. Kobebisa ntango na yango te, ata moke te. Yesu asalaki ndenge moko, Alobaki: “Tika bango. Soki mokufi miso akambi mokufi miso, bango mibale bakokwea na libulu te?”

¹⁶⁹ Kasi ntango Akómaki liboso na mwasi ya ndumba, [Ndeko Branham alelisi misapi na ye—Mok.] móto epelaki! Ezalaki nini? Momboto oyo eponámá ezalaki wana, bomoni, oyo emonaki Yango mbala moko mpenza. Ntango Ekómaki epai ya Petelo, momboto oyo eponámá ezalaki wana, bomoni, mpe bamonaki Yango. “Mpe baoyo nyonso Tata asílá kopesa, asílá” (eleko eleka) “kopesa Ngai, bakoya. Bakoya epai na Ngai.” Oh, la la! Nalingaka yango mingi! Iyo, mesie. Bótala, bandimi nde bandimaka Yango.

¹⁷⁰ Bazángi-kondima bakoki kondima Yango te. Boye, sikawa, soki moto alingi kowélana na ntina na momboto na nyoka ná nyonso wana, mpe omeki kotalisa ye, bakoyoka Yango te; kende na yo. Tika na yo bango. Bomoni, Nzambe aswanaka te, bana na Ye mpe basalaka yango te.

¹⁷¹ Bótala, Bayuda nkóto mokama na ntuku minei na minei oyo Nzambe aponá bakúmbamelaka nyama te, ná mimesano na ye ya ba-dénomination, to bikeko, to eloko nini, ata ekólo na bango ekozala na boyokani ná yango na ntango yango. Yisraele ekozala na kati ya boyokani, kasi bankóto mokama na ntuku minei na minei bango oyo, bango bakosala yango te. Bango nde baponami.

¹⁷² Ezali ndenge moko awa na Lingomba ya Mabota sikawa, ezali etóngá oyo eponámá. Okoki kobenda bango na makambo ya ndenge wana te. Bakondima yango te. Te, mesie. Kaka ntango Pole ebétaka bango, yango ekataka likambo yango mbala moko. Bamonaka . . . bamonaka yango kosalema, nsima na yango bamonaka yango kokokisama mpe kotalisama polele ndenge wana. Mpe batalaka awa na Biblia, bamonaka ete Liloba yango kolóngóbana. Ee, malamú ete ó—ótika na yo kobebisa ntango na yo ná bango, mpo bandimi Yango. Esili. Esili. Ata bakoki kolimbola Yango te, kasi bayebi ete bazali na Yango. Boye,

ndenge nalobaka, ezali na makambo mingi oyo nakoki kolimbola te, kasi na—nayebe ete ezali mpenza solo, ata bongo. Ah-ah. Malamu.

¹⁷³ Ntango yango ezalaki katikati na Elembo ya Motoba ná ya Nsambo, ntango Akobenga bato yango, baoyo Yesu alobelaki na Matai mokapo ya 24, molongo ya 31, oyo touti kotánga, bomoni. Ba-kelelo awa, batatoli mibale ya... Ntango kelelo ekoyula, ekozala kelelo ya batatoli mibale ya eleko ya ngolu mpo na Bayuda. Kelelo moko ekoyula, bótala, kelelo moko ekoyula. Alobaki ete Akoyula kelelo. Sikawa bótala awa, na molongo ya 31.

*Akotinda banje na ye (moko te, bomoni; bazali mibale)
ná lokito makasi ya kelelo, . . .*

¹⁷⁴ Ezali nini? Soki Nzambe alingi koloba, lokito ya kelelo eyokanaka. Ezalaka ntango nyonso Mongongo na Ye. Ezobenga bato na etumba, bomoni. Nzambe alobi. Banje yango bakoya na lokito ya kelelo.

¹⁷⁵ Mpe bomonaki ete na Nsango ya mwanje ya nsuka, kelelo ekoyula. Na nsango ya mwanje ya liboso, kelelo eyulaki; oyo ya mwanje ya mibale, kelelo eyulaki, ntango Atindaki yango. Bótala, kasi ntango Bilembo esakolamaki, nyonso wana esalemaki na eloko ya nkembo moko ya Bonzambe, mpo na kobenga mpe kobimisa etonga moko ya bato; kelelo moko eyulaki, mpe Bilembo Nsambo efungwamaki.

¹⁷⁶ Botala: “Kosangisa Bayuda na Ye oyo baponámá longwa na nsóngé minei ya likoló.”

¹⁷⁷ Alobelaki Bilembo motoba, ndenge tomonaki, kasi Elembo ya Nsambo te. Atikálá koloba ekolo moko te awa na ntina na Elembo ya Nsambo, esika moko te.

¹⁷⁸ Bomoni, mbala moko, na molongo ya 32, Akómi koloba na masepe oyo etali ntango ya kobenga Bayuda oyo baponámá. Sikawa bótala malamu awa, bomoni.

¹⁷⁹ “Akotinda banje ná kelelo, mpe bakosangisa Baponami longwa nsóngé minei ya likoló.” Sikawa Abandi. . .

¹⁸⁰ Bomoni, Alobi eloko moko te na ntina na Elembo ya Nsambo awa. Bomoni? Alobelaki Elembo ya Motoba; ya Liboso, ya Mibale, ya Misato, ya Minei, ya Mitano mpe ya Motoba.

¹⁸¹ Kasi bótala:

*Bóyekola liteyo uta na njete na mosuke; Wana bitape
na yango ekolemba mpe ekobimisa nkasa na yango,
boyebe ete ntango na moi makasi elingi kobeleva:*

*Bino mpe bongo, wana ekomona bino makambo oyo
yonso, bokoyeba ete ajali penepene, ata na ekuke.*

¹⁸² Motuna ya nsuka oyo batunaki Ye: “Elembo nini ekotalisa nsuka ya mokili?”

¹⁸³ “Ntango bokomona Bayuda . . . Ntango bokomona makambo mosusu oyo kosalema, bokoyeba makambo nini ekosalema. Sikawa, ntango bokomona Bayuda . . .” Azalaki koloba na Bayuda! Sikawa bótala malamumu. Azali koloba na banani, na Mabota? Na Bayuda! Na Bayuda! Bomoni?

¹⁸⁴ Sikawa Alobaki: “Bikólo nyonso bakoyina bino mpo na Nkombo na Ngai,” mpe bongo na bongo, ndenge wana.

¹⁸⁵ Sikawa: “Ntango,” Alobaki, “bokomona Bayuda oyo kobanda kobimisa nkasa na bango ya sika kuna,” ntango bana ya Yisraele bakobanda kozónge, mpo na kokóta na mboka na bango. Ntango bakokóma kuna, (Lingomba ebelemi mpo na konétolama), ekotikala bobele mibu misato na ndambo liboso na nsuka ya mokili ya kala, mpe esili kokota na mobulu, mpe Millénium ekobanda, mpo na mabelé ya—ya sika. Alobaki: “Ekómi ata na ekuke!” Sikawa, mibu nkóto na mokili ezali kaka mokolo moko mpo na Nzambe. Bongo mibu misato na ndambo ekopesa ntango boni? Kaka mwa ba-seconde, na ntango ya Nzambe. Yango wana Alobaki: “Ekómi na ekuke.”

Solo solo nalobi na bino ete, Libota oyo ekoleka te, ekosila te, bato oyo, kino makambo oyo nyonso é . . .

¹⁸⁶ Nini, eloko yango nini ekosila te? Baluká ntango nyonso koboma Bayuda, kosilisa bango na mokili. Bakokoka ata moke te kosala yango.

¹⁸⁷ Kasi bótala. Ekeke mpenza ya Bayuda, oyo bakomona bozongi na Palestine, ekeke yango ekomona makambo yango kosalema. Mpe kaka na mibu mibale oyo euti koleka nde basili kokóma mpenza ekólo, ná mbongo na bango moko mpe nyonso wana. Bango wana mpenza.

¹⁸⁸ Sikawa, tokómi wapi, moninga? Bilembo mpe nyonso ezali kofungwama; sikawa tozali komona oyo ezali kosalema awa na katikati. Yango mpenza. Bomoni epai tokómi?

¹⁸⁹ Nazolikia ete bozosósola Yango. Ngai natángá mingi te. Nayebi oyo nazolobela, kasi ntango mosusu nakoki kolimbola—kolimbola Yango te, mpo esósolama na bino. Kasi nabanzi ete Nzambe akozua Maloba oyo esangáni-sangáni, mpe akokabolela bino yango malamumu, bomoni, mpe akoyebisa bino oyo Yango ezali. Mpamba te, ekómi, tokómi pene. Tokómi na ntango yango. Sikawa bótala.

¹⁹⁰ Bomoni, na mbala moko, Alobeli na ntina na Bayuda oyo, ná ntango—ntango ya nsuka. Alobi eloko oyo ekosalema. Toyebi kutu ete sikawa . . . Toyebi, toyebi malamumu mpenza ete mabota yango epalangáná. Bapalangáná, ekokisi mibu nkóto mibale na nkama mitano. Esakólamáká ete bakopalangana na mipepe minei. Boyebaki yango? Toyebi yango.

¹⁹¹ Na ntembe te, tokozala na ntina te ya kozonga nsima, kozua mpe kolobela yango lisusu, mpamba te nazali na likambo moko

ya motuya mingi, oyo nalingi ete bómona, liboso bólemba, mpe ngai nálemba mpenza.

¹⁹² Bótala. Toyebi ata ete mabota nyonso, kokokana na kolandana ya ntango ya mabota, to ndenge nyonso bokolinga kobenga yango, to géologie, to bisika ya mabota, ezali lisusu esika moko te. Epalangáná, bipai nyonso.

¹⁹³ Bayuda oyo bazali kosangana na Yelusaleme, bazali te. . . Bayebi ata mabota na bango te. Bazalaka lisusu na ba-bendéle ya mabota te, to eloko moko. Boye nyonso oyo bayebi ezali ete bazali Bayuda. Esakolamáká ete bakozala bongo, na mokili mobimba. Sikawa, babuku na bango esilá kobébisama. Bayebi te.

Soki otuni bango: “Ozali moto ya libota nini?”

“Nayebi te.”

“Libota nini?”

“Nayebi te.”

¹⁹⁴ Moko azali moto ya libota ya benyamina, mosusu ya libota oyo, mpe mosusu ya libota wana. Bayebi te esika bauti. Babuku na bango esilá kobébisama, na bitumba, na mibu nkóto mibale na nkama mitano. Eloko bobele moko oyo bayebi ezali ete bazali Bayuda. Esili. Boye, bayebi ete basili kozonga na mabelé na bango. Nzokande bango. . . Bótala, ata bayebi mabota na bango te, kasi Nzambe ayebebi yango.

¹⁹⁵ Nalingaka yango mingi! Boyebi, Alobaki ata ete ezali na. . . “Motángó ya suki nyonso ya motó na yo eyebani.” Hum! Bótala, Abungisi eloko moko te. “Nakosekwisa ye na mokolo ya nsuka.”

¹⁹⁶ Ata basilá kobúngisa ba—ba—ba-bendéle ya mabota na bango, mpe bayebi te nani azali nani, mpe soki bazali ya libota oyo to oyo wana; bayebi te soki bazali ya libota ya Benyamina, to soki bazali na libota ya Lubene, to—to ya Yisakala, to ya libota nini. Kasi, ata bongo, Nzambe abéngi bango awa.

¹⁹⁷ Sikawa bótala, na Emoniseli 7, totángi boye. “Nkóto zomi na mibale” ya libota moko na moko, baponami, kati na yango nyonso. Bazali bato nkoto zomi na mibale ya libota moko na moko, oyo baponámá, mpe batiami mpenza awa na molongo. Oh, la la! Bazali nini? Bazali na molongo ya mabota. Ata sikawa bazali na yango te, kasi bakozala na yango. Bazali na molongo ya mabota. Nini ekozala na molongo ya mabota? Moyuda nyonso te, te. Kasi baoyo baponámá, bato nkóto mokama na ntuku minei na minei nde bakotiana na molongo ya mabota. Oh, la la!

¹⁹⁸ Ndenge nakolinga mpenza kotalisa bino yango! Tokokóta na bozindo na yango te. Kasi lolenge wana mpenza nde Lingomba esengeli kozala, ah-ha, na molongo mpenza.

¹⁹⁹ Sikawa nalingi bólanda na bokebi mpenza, mpe bótánga elongo ná ngai, mpo na miniti moko. Sikawa bótala likambo moko awa, ntango mosusu, botikálá komona yango te na ko—

kobéngama ya mabota. Nayebisaki bino, kala mingi te, ete bótánga Emoniseli 7. Bótánga yango elongo ná ngai, mpe bótala mabota yango malamú. Na Emoniseli 7, Dáni ná Efelaima bazáangi, mpe batángami kati na bango te. Bomonaki yango? Yosefe ná Lewi bazuaki bisika na bango. Bomonaki yango? Dáni ná Efelaima bazali kuna te. Te, misie. Kasi, Yosefe ná Lewi nde bazuaki bisika ya—ya—ya Dáni ná Efelaima.

²⁰⁰ Mpo na nini? Bango. . . Nzambe oyo amikundolelaka ntango nyonso amikaniseli elaka nyonso ya Liloba na Ye. Oh, nakosepela koteya yango. Bomoni? Nzambe abosanaka eloko moko te, ata emonanaka lokola bongo.

²⁰¹ Ndenge Ayebisaki Mose. Yisraele esilaki kozala kuna “mibu nkama minei.” Kasi basengelaki kozala kuna na ntango yango. Ayebisaki Abraham: “Mpe momboto na ye bakofanda na mboka mopaya na mibu nkama minei, bongo Akobimisa bango ná loboko ya nguya.” Kasi na bongo Alobaki na Mose: “Namikaniseli elaka na Ngai, mpe Nakiti mpo na kokokisa oyo Nalobaki.”

²⁰² Nzambe abosanaka te. Abosanaka bilakeli mabe na Ye te, Abosanaka mpe mapamboli na Ye te. Kasi, elaka moko na moko oyo Apésá, Akangamaka na yango.

²⁰³ Bótala sikawa ntina oyo bango bazzalaki te, soki botali malamú. Sikawa bótanga. Nalingi ete bótánga elongo ná ngai sikawa. Bózua Dutelonome, molongo ya ntuku mibale na- . . . ya 29 kuna, to mokapo ya 29, kútu. Ntina moko ezali mpo mabota yango ézanga kozala kuna. Likambo nyonso ezalaka na ntina. Dutelonome, tolingi kozua mo—mokapo ya 29 ya Dutelonome. Sikawa, Nkolo ázunga biso, mpo tósosola sikawa. Sikawa tolingi kobanda na Dutelonome, mokapo ya 29, na molongo ya 16. Sikawa bóyoka. Mose azali koloba.

(Bino boyebi motindo efandaki biso na mokili na Ejipto; mpe motindo elekaki biso na kati na mabota oyo biso tolekaki na kati na yango;

Mpe bino bomonaki biloko na bango ya mbindo, bikeko na bango na njete. . . na libanga, na palata. . . na wolo, oyo ijalaki kati na bango.)

²⁰⁴ Moto nyonso azalaki na eloko moko to mosusu, mwa ekeko ya Santu Cecile. Boyebi, likambo moko ya ndenge wana, bomoni. “Bókeba ete. . .” Bóyoka.

Bokeba ete mobali moko, . . . mwasi moko, to bandeko, to libota moko, baoyo na mitema mipengwi lelo na Yawe Njambe na biso, mpo na kokenda kosalela banjambe na mabota yango; bájala na kati na bino te, ete ntina na mbondo na bololo éjala na kati na bino te;

Moto oyo, wana eyoki ye maloba na kondimana oyo na ndai, ako—akomipambola ye mpenja na motema na ye

*ete, mpe akoloba, Na . . . najali na kimia, ata natamboli
na motó makasi na motema na ngai mpenza, . . .*

205 Bomoni, bato balobaka: “Oh, amipamboli ye moko.” Boyebi, basalaki mwa elembo moko ya ekulusu to eloko moko, ndenge basálaka sikawa, bomoni; ndenge moko, bomoni. Mpe bomoni ete etalisaka bopakano, bomoni, ezali lokola bapakano.

*. . . akomipambola ye mpenza na motema na ye ete, . . .
na motó makasi na makanisi na ye moko, na kolongola
oyo ejuaka mai na oyo ejangi mai:*

206 “Komela masanga, esalaka eloko moko te; lokola okendeke na yo na losambo, mabe ezali te.”

*Na bongo Yawe akolimbisa ye te, kasi nkele na Yawe . . .
jua na ye ikopela epai na moto yango, mpe na bilakeli
mabe bikomami na kati na buku oyo (“Kolongola Liloba
moko te kati na Yango, to kobakisa eloko moko te likoló
na Yango,” bomoni.) bikokwela ye, mpe Yawe akolongola
ye. . . akolongola nkombo na ye na nse na lola.*

207 Wana ezali ntango azali awa na mokili, bomoni, “na nsé ya lola.”

*Yawe mpe akopona ye moko na kati na mabota yonso
ya Yisraele mpo na likamba, kokokana na elakeli mabe
na kondimana oyo ekomami na buku oyo na mobeko:*

208 Na yango, “Soki moto asaleli nzambe ya ekeko, to aláti nzambe ya ekeko na nzoto, to amipamboli na makanisi na ye moko, mpe asaleli banzambe ya bikeko,” Nzambe alobaki ete, “ézala mobali, mwasi, bandeko, to libota, nkombo na ye ekolongolama mpenza, katikati na bato.” Sikawa, ezali bongo? Ezali mpenza solo!

209 Losambo ya bikeko esalaki ndenge moko na kati ya lingomba, eleki mibu, ezali kosala bongo lelo. Mpe namonaka . . . Bótala malamumu ndenge motemeli-na-Klisto amekaki kotelemela yango. Bato boni bayebi ete zabolo azuaka lolenge, mpe alandaka ndakisa ya—ya basantu ya Nzambe?

210 Lisumu ezali—ezali nini? Ezali likambo ya solo oyo ebébisami. Lokuta ezali nini? Ezali solo oyo elobami mabe. Ekóbo ezali nini? Ezali likambo ya malamumu, oyo elóngobani na mobeko, oyo esálelami na ndenge ya mabe. Bomoni?

211 Sikawa, na oyo etali “kolongola nkombo,” bomonaki ete, na eleko ya lingomba, kaka nyama oyo apesaka bato bikeko ya bato bakúfá, mpe bongo na bongo, nde amekaki kolongola Nkombo ya Nkolo Yesu Klisto, mpe kopesa bibiangelo lokola Tata, Mwana, mpe Molimo Mosanto. Ndenge moko, ná elakeli mabe oyo ezalaka nsima na yango, ndenge wana.

212 Yango nde Dani ná Efelaime basalaki mpenza, na ntango ya mokonzi moko ya bilongi mibale na Yisraele, mokosi monene, Yelobama. Sikawa, bótala, na Mikonzi ya Liboso mokapo ya 12.

Nayebi ete tozali . . . Oyo, mpo na ngai, e—e—ezali kotia mobóko ya likambo oyo tokoki kotalela, oyo tokoki komona. Mikonzi ya Liboso, nalingi kozua mokapo ya 12, molongo ya 25 kino na molongo ya 30.

Yelobama . . . Sekeme na mokili na ngomba na Efelaima mpe afandaki kuna; mpe akendeki kino . . . mpe atongaki Penuele.

Mpe sikawa, Yelobama alobaki epai . . . na—na motema na ye, (bomoni, makanisi ya motema na ye), Sasaipi bokonji ekozonga epai na ndako na Davidi:

213 Akómaki kobanga, bomoni, mpo bato bakokaki kobima.

Soko bato oyo bakobuta . . . kokaba mbeka na ndako na Yawe na Yelusaleme, bongo mitema na bato oyo ekozonga epai na nkolo na bango lisusu, epai na Lehobama, mokonji na Yuda, bakoboma ngai mpe bakojonga . . . epai na Lehobama—Lehobama, mokonji na Yuda.

Boye, mokonji alukaki toli mpe asalaki bana mibale na ngombe na wolo, alobaki na bango ete, Longwa ntango molai, bosili kokendaka na Yelusaleme: tála banjambe na bino, E Yisraele, baoyo balongoli bino . . . na mokili na Ejipito.

Atemisaki moko na Betele mpe mosusu atiaki na Dáni.

Likambo oyo ekomaki lisumu: mpamba te bato bakendaki kosambela liboso na moko kino na Dáni.

214 Bomoni, Efalaima na Betele, ná Dáni, batelemisaki banzambe ya bikeko. Mpe bakendeki kokumbamela yango.

215 Mpe biso oyo, tokómi mpenza pene na eleko ya Millénium, kasi Nzambe azali komikanisela lisumu yango kino lelo. Kuna, batángamaki ata te. Hé! Nkembo! Kaka ndenge Amikaniselaka elaka moko na moko ya malam, Amikaniselaka mpe elaka moko na moko ya mabe. Bómikanisela, ntango . . .

216 Yango wana, nabanzi, baninga, namekaka ntango nyonso kotikala ná Liloba yango, ata Emonani ndenge nini.

217 Bomoni, sikawa, bango baboyaki kokanisa likambo yango kuna, na ntango wana. Bakanisaki yango te, na ntango wana. Bango bakanisaki: “Ee, bamilongisaki.” Malam.

218 Kasi bango oyo awa kati na eleko ya Millennium oyo elingi kobanda, ntango bankombo ná mabota na bango “elongolami” kuna, mpo basalelaki losambo ya bikeko, oyo Nzambe asiláká kolakela mabe.

219 Alobaki te ete “Ayinaki” Banikolaiti ná Yezabele wana? Bózala mosika na yango. Alobaki te ete Akoboma bana basi ya Yezabele, ete Akoboma bango na “liwa,” elingi koloba bokabwani ya Seko ná Bozáli na Ye? Bótiá motema na yango ata

moke te. Bózala mosika na yango. Boye, Nzambe amikaniselaka. Bótala.

²²⁰ Kasi bomonaki kuna, ete esengelaki “kolongolama”? Mpo na nini? Na nsé ya Lola, Mbeka ya nokinoki ezalaki te, oyo ekokaki kopesa ye Molimo Mosano, mpo ákoka komona makambo yango. Kasi asalaki yango, ata bongo, na makanisi na ye moko ya moyími.

²²¹ Kasi, Ezekiele, na emononeli na ye, na Millenium, amoni bango lisusu na molongo mpenza. Ezekiele, soki bolingaki kotanga yango. Bókoma yango kaka, mpe bokoki kotánga yango, mpo na kowela ntango. Ezekiele 48:1 kino 7, bótanga mpe 23 kino 29. Ezekiele amonaki libota moko na moko na molongo mpenza. Malamu.

²²² Mpe, lisusu, na Emoniseli 14, Yoane amonaki bango lisusu na molongo ya mabota, ezali ya solo, libota moko na moko na esika na yango. Likambo nini esalemaki?

²²³ Bomikanisela, Alobaki: “Na nsé ya lola, ete nkombo na ye ekolongolama na kati ya mabota.” Na ntango nyonso oyo akozala na nsé ya lola, ekozala lisusu te. Mpe bato nkóto mokama na ntuku minei na minei yango bazali naino awa, na lolenge ya mabota. Ya solo. Kasi, bomoni, basilaki kobomama miso. Bazalaki bobele na mbeka ya bangombe ná bantaba. Bomoni? Sikawa bótala, Alongolaki bango “na nsé ya lola.”

²²⁴ Kasi mpo na bato ya Mabota, na mikolo ya Molimo Mosanto, kotelemela Yango; nkombo na yo elongolamaki mpenza, na Buku ya Bomoi, “mpe okoki kolimbisama ata moke te, na mokili oyo to na mokili oyo ekoya.” Ya solo? Boye, totelemi nde wana.

²²⁵ Yisraele, na ntango ya bantaba ná bampate, ba—bazalaki mpenza na esika. Na ntango nyonso oyo bazalaki awa na mokili, mabota na bango ezalaki te. Bakokaki ata moke te kozala na kati. Sikawa, nyonso...Ntango abéngaki bango, kuna, bato nkóto mokama na ntuku minei na minei, bango bazalaki te. Ya solo. Batángami ata kuna na kati te. Yosefe ná Lewi nde batiámaki na esika ya Dáni ná Efelaima. Sikawa bokoki kotala yango. Yango wana mpenza, liboso na bino, bomoni. Mpe elaka ya Nzambe yango oyo, kala mpenza kuna, mibu nkama na nkama liboso na yango.

²²⁶ Sikawa, likambo nini esalemaki? Bapétolamaki na ntango ya eleko ya Monyoko ya nsómo.

²²⁷ Sikawa, soki Nzambe akopetola mo—mongondo yango, oyo azalaki mwasi moko malamu, kasi azángaki nde kotia mafuta na mwinda na ye, mpe Akopetola ye kuna, na nzela na minyoko. Akolekisa mabota yango kuna, na likambo moko wana, mpe Akopetola bango na ntango ya eleko ya Monyoko. Mpamba te, ezali ko—kopetolama. Ezali kosambisama. Kasi, bomoni, bango, nsima na...Mpe, báyoka, bato nkóto mokama na ntuku minei na minei bayei, nsima na kopetolama ya Yisraele. Bangondo

oyo balálaki mpongi mpe bayei, bapetolami, mpe baláti bilamba ya mpembe. Bomoni? Ebongi mpenza be! Ezali mpenza kitoko mingi!

²²⁸ Kaka lokola Yakobo mpenza, na ntango ya mpasi, bomoni. Bango. . . Yakobo, na ntango ya mpasi. Asaláká mabe. Kasi alekaki na ntango ya kopetolama mpo asaláká mabe na ndeko na ye, Esau. Bomoni? Abukaki lokuta, mpo ázua makoki na ye ya bokulutu. Kasi alekaki na kopetolama, liboso nkombo na ye ékoka kobongwana longwa na Yakobo kino na Yisraele, oyo ezali elilingi ya molongo ya Nzambe, elilingi ya lelo.

²²⁹ Sikawa, tokozua molongo ya 8, to, molongo ya 1, nalingaki koloba, ya mokapo ya 8; Emoniseli 8:1.

²³⁰ Nayebi ete bolembi. Kasi, sikawa, bómeka koyoka na miníti moke sikawa. Mpe, tika ete Nzambe ya Lola ásungu biso, yango nde libondeli na ngai.

²³¹ Tosengeli komikanisela ete Elembo ya Nsambo oyo ezali nsuka ya ntango, ya makambo nyonso. Ya solo. Makambo oyo ekomámá na Buku ya Bilembo Nsambo, oyo ekangamaki na bilembo, na ntina na mwango ya lisiko, uta liboso na kozalisama ya mokili, nyonso wana ekómi na nsuka. Ezali nsuka; ezali nsuka ya mokili ya kobundabunda. Ezali nsuka ya bokelami ya kobundakabunda. Ezali nsuka ya makambo nyonso. Kuna nde nsuka ya baKelelo ezali. Ezali nsuka ya baMbeki. Ezali nsuka ya mabelé. Ezali. . . Ezali kutu nsuka ya ntango.

²³² Ntango ekómi na nsuka. Biblia elobi bongo. Matai, mokapo ya 7. . . nalingaki koloba, Emoniseli, 7 mok-. . . mokapo ya 10 mpe mo. . . mpe molongo ya 1 kino 7. Ntango ekómi na nsuka. Mwanje alobaki: “Ntango ekozala lisusu te,” ntango oyo, na mikolo oyo likambo monene oyo ekosalema.

²³³ Nyonso ekómi na nsuka, na ntango oyo, nsuka ya—ya. . . na nsuka ya Elembo ya Nsambo oyo. Bótala. Ezali nsuka ya eleko ya lingomba. Ezali nsuka ya—ya Elembo ya Nsambo. Ezali nsuka ya baKelelo. Ezali suka ya baMbeki, ezali mpe nsuka ya bokóti na Millennium. Yango ezali na Elembo ya Nsambo.

²³⁴ Ezali mpenza lokola ntango batindaka fizé na mipepe. Fizé yango epasuki *awa*, mpe emati, nsima na yango epasuki lisusu. Ebimisi minzoto mitano. Moko na minzoto yango epasuki mpe etindiki minzoto mitano uta na yango; na nsima moko na minzoto yango epasuki mpe etindiki minzoto mitano uta na yango. Bomoni, ekóbi bongo kino élimwa.

²³⁵ Ezali mpe bongo mpo na Elembo ya Nsambo. Esukisi nde ntango mpo na mokili oyo. Esukisi ntango mpo na *oyo*. Esukisi ntango mpo na *oyo wana*. Esukisi ntango mpo na *oyo*. Esukisi ntango. Nyonso ekómaki na nsuka na Elembo ya Nsambo yango.

²³⁶ Sikawa, Akosala yango ndenge nini? Yango nde likambo oyo toyebi te. Boye te? Toyebi te.

237 Ezali ata ntango ya makambo nyonso wana, mpe kokóta na Millénium.

238 Bótala, bofungwami ya Elembo oyo ezalaki likambo ya monene mingi, na lolenge ete, mpo na Yango, Likoló efándaki “kimia na boumeli ya ndambo ya ngonga.” Sikawa, ezali Likambo monene! Ezali nini? Lola efandaki kimia. Eloko moko te eninganaki, na ndambo ya ngonga.

239 Sikawa, ndambo ya ngonga, ntango mosusu ekoki kozala na yango molai te, soki ozali kolekisa ntango ya malamumu. Kasi, soki ozali katikati na liwa ná Bomoi, ezalaki lokola Millennium. Ezalaki mpenza likambo monene!

Yesu alobelaki Yango ata moko te. Ata moko te na bango.

240 Yoane akokaki ata kokoma Yango te. Te, bapekisaki ye kokoma yango *awa*. Bomoni, ezali bobebe na...bobebe... Akomaki Yango te, kasi oyo ezali kimia.

241 Mpe bampaka ntuku mibale na minei oyo batelemaki liboso na Nzambe, Kuna, kobetáká nzenze; batikaki kobeta nzenze.

Banje batikaki koyemba, na Likoló.

242 Bokanisa naino! BaKeluba ná baSelafa ya bulee, Oyo Yisaya amonáká na tempelo, ná mapapu motoba...to motoba. Misato...Mibale mpo na kozipa elongi, mibale mpo na kozipa makolo, mpe mibale mpo na kopumbwa. Mpe bazalaka wana, butu moi, liboso na Nzambe, koyémbaka: “Santu, santu, santu, Nkolo Nzambe na-Nguya-nyonso!” Mpe ata ntango bazalaki kotambola, to kokóta na tempelo, makonzi ya tempelo eninganaki, ná bozali na—na bango.

243 Mpe baSeláfa ya bulee oyo bafandaki kimia. Banje batikaki koyemba. Iyo. Fiuu! Kopumbwáká liboso na Bozali ya Nzambe, koyémbáká: “Santu, santu, santu,” Bakangaki minoko. Ata Mwanje moko te ayembaki lisusu. Masanzoli te. Mosala moko te na—na etumbelo. Te, eloko moko te. Ekomaki kimia; kimia makasi, kimia ya nsomo na Likoló, na ndambo ya ngonga.

244 Mampinga nyonso ya Likoló bafandaki kimia na ndambo ya ngonga, ntango libombami ya Elembo ya Nsambo ya Buku ya Lisiko efungwamaki. Bókanisa naino. Kasi, Efungwami. Mwana-mpate nde afungoli Yango. Boyebi nini? Ekamwisaki bango, nabanzi. Bayebaki te; Tala Yango wana! Batikaki mbala moko.

245 Mpo na nini? Ezali Nini? Sikawa, moko te kati na biso ayebi. Kasi, nako—nakoyebisa bino, emoniseli na—na ngai na ntina na Yango.

246 Mpe, sikawa, nazalaka moto ya bilandá-landa te. Soki nazali bongo, nayebi yango te, bomoni. Nazali...Namesana te komemama na makambo ya makanisi ná mabánzo.

²⁴⁷ Nasilá koloba makambo oyo ekokaki kozala ndenge, tóloba, mpo na bato mosusu. Kasi ntango Nzambe ayei, nsima na Yango, mpe Akokisi Yango mpe Alobi ete Ezali Solo, boye, Ezali Liloba na Nzambe. Bomoni? Ekoki komonana ndenge, lolenge wana. Bomoni?

²⁴⁸ Sikawa, na bosolo mpenza lokola natelemi na etumbelo na mpokwa oyo, nazuaki emoniseli oyo emonisaki yango. Ezali na ndenge misato. Oyo nakoyebisa bino, na lisungi ya Nzambe, moko na Yango. Na nsima bino...Tólobela yango naino. Emoniseli yango oyo, mpo na kobanda eloko oyo nalingi koyebisa bino, oyo Yango ezali. Eloko oyo esalemi ezali ete...BaNkake Nsambo oyo ayokaki konguluma, mpe apekisamaki kokoma Yango; yango nde oyo libombami yango ezali, ezali nsima na Nkake Nsambo oyo engulumaki moko nsima na mosusu.

²⁴⁹ Sikawa, mpo na nini? Tótalisa yango polele. Mpo na nini? Ezali sekele oyo moto moko te ayebi. Yoane apekisamaki kokoma Yango, ata—ata kokoma elembo moko na Yango. Mpo na nini? Yango wana ata mosala—mosala moko te esalemaki na Likoló: ekokaki kobimisa sekele. Bomoni yango sikawa? [Losambo balobi: “Amen.”—Mok.]

²⁵⁰ Soki Ezali likambo ya nkembo mingi, Esengeli kotiamana na kati, mpo Esengeli kosalema. Kasi ntango Nkake Nsambo...

²⁵¹ Sikawa bótala. Ntango Banje nsambo bayáki koyula baKelelo na bango, nkake moko engulumaki. [Ndeko Branham abeti eteyelo mbala moko—Mok.] Ntango Yisraele bazalaki kosangana, kelelo ezalaki koyula. “Wana ntango ekozala lisusu te,” kelelo ya nsuka, nkake moko.

²⁵² Kasi awa, Nkake Nsambo elandanaki, moko nsima na mosusu: moko, mibale, misato, minei, mitano, motoba, nsambo, motángo wana oyo ebongi be. Nkake Nsambo eyokanaki moko nsima na mosusu, ezali te...elandanaki kaka—kaka, moko, mibale, misato, minei, mitano, motoba, nsambo, moko nsima na mosusu. [Ndeko Branham abeti na eteyelo mbala nsambo—Mok.] Na bongo, Likoló ekokaki kokoma Yango te. Likoló ekoki koyeba Yango te, eloko mosusu te, mpo eloko moko te ekoki kosunga kokóba. Ezalaki ntango ya kimia. Ezalaki likambo ya nkembo mingi, na lolenge ete Banje bayebaki sekele yango te.

²⁵³ Sikawa, mpo na nini? Soki Satana azwi Yango, akoki kosala mbeba mingi. Wana nde eloko moko ayebi te. Sikawa, akoki kolimbola nyonso oyo alingi, mpe komekola likabo ya ndenge nyonso, (nabanzi bozoyekola), kasi akoki koyeba Likambo oyo te. Ekomami ata na Liloba te. Ezali sekelé na mobimba.

²⁵⁴ Banje, eloko nyonso, ekangaki monoko. Soki báninganaka ata moke, elingaki kopesa bango mwa likanisi, na bongo, bakangáki kaka minoko, batikaki kobeta nzenze. Nyonso etikaki kosala.

²⁵⁵ Nsambo ezalaka motángo ya Nzambe ya kobonga be. Nsambo, [Ndeko Branham abeti eteyelo mbala nsambo—Mok.] moko nsima na mosusu mpenza. Nkake Nsambo eyokanaki moko nsima na mosusu na mbala moko, lokola ezalaki koloba nkómá moko na moko ya eloko moko. Bótala, na ntango yango, Yoane abandaki kokoma Yango. Alobaki: “Kokoma Yango te.”

²⁵⁶ Yesu atikálá kolobela Yango te. Yoane akokaki kokoma Yango te. Banje bayebi eloko moko te na ntina na Yango. Ezali Nini? Ezali likambo oyo Yesu alobaki: “Ata Banje ya Likoló bayebaki eloko moko te” na ntina na Yango. Bomoni? Bomoni? Ye moko mpe Ayebaki Yango te. Alobaki: “Bobebe Nzambe” nde akoyeba Yango.

²⁵⁷ Kasi Ayebisaki biso, ntango “tokobanda komona bilembo oyo kokokisama.” Sikawa bobandi kokóma esika moko boye? [Losambo balobi: “Amen.”—Mok.] Malamu. Bótala, “tobandi komona bilembo oyo kokokisama.” Bomoni?

Soki Satana ázuaka Yango . . .

²⁵⁸ Soki olingi ete likambo moko ésalema . . . Sikawa bosengeli kondima maloba na ngai mpo na likambo yango. Soki nakani kosala likambo moko, nakebaka mpenza ete naloba yango na moto moko te. Ezali te ete moto yango akoloba yango, kasi Satana akoyoka yango. Bomoni? Akoki koyeba yango te, na kati ya motema na ngai, ntango nyonso oyo Nzambe akangi yango ná Molimo Mosanto, boye, ezali katikati na ngai ná Nzambe. Bomoni? Akoyeba eloko moko te na ntina na yango, kino óloba yango, bongo akoyoka yango. Mpe namekaka . . . Soki nayebisi na bato ete nakosala likambo *boye na boye*, okomona zabolo akosala nyonso mpo na kobulunganisa makambo kuna, bomoni, mpo na kolekela ngai na likambo yango. Kasi soki nazui emoniseli uta na Nzambe, mpe nalobi eloko moko te na ntina na yango, na ntango wana ezalaka ndenge mosusu.

²⁵⁹ Bómikanisela, Satana akoluka komekola. Akoluka komekola nyonso oyo Lingomba ekosala. Amekaki kosala yango. Tomonaki yango, na nzela na motemeli-na-Klisto.

²⁶⁰ Kasi oyo ezali likambo moko oyo akoki komekola te. Bomekoli ya oyo ekozala te, bomoni, mpo ayebi Yango te. Lolenge moko te ezali mpo na ye koyeba Yango. Ezali Pull ya Misato. Ayebi eloko moko te na ntina na Yango. Bomoni? Asósoli Yango te.

²⁶¹ Kasi sekele moko ezali na nsé na Yango! Nkembo na Nzambe na Bisika bileki likoló! Nakoki lisusu kokanisa ndenge nazalaki kokanisa te, na bomoi na ngai mobimba, nsima na ngai komona. Sikawa, nayebi te oyo . . . nayebi etape oyo ekolanda kuna, kasi nayebi te nini, ndenge nini kolimbola yango. Ekoumela te. Nakomaki awa, ntango esalemaki, soki bokoki komona awa: “Télema. Kokende mosika koleka oyo awa te.” Nazalaka moto ya bilandá-landa te. Nazali bobele koloba Solo.

²⁶² Kasi bómikanisela mwa lokolo ya sapáto, oyo nazalaki ntango nyonso komeka kolimbola ndenge elimo ezalaka mpembeni na eloko *boye na boye*, mpe lisosoli ya kati, ná makambo nyonso ya ndenge wana? Esalaki kaka ete etonga moko monene ya bamekoli bábanda nsima na yango. Ndenge bakómaki kosimba loboko ya moto, mpe koyoka yango koningana? Maboko ya bato nyonso ekómaki koningana.

²⁶³ Kasi bómikanisela, ntango Amemaki ngai kuna na likoló, mpe Alobaki: “Oyo ezali Pull ya Misato, mpe moto moko te akoyeba Yango.” Bomikaniseli yango lisusu? [Losambo balobi: “Amen.”—Mok.] Bimononeli ekweyaka ata moke te. Ezalaka mpenza be Solo.

²⁶⁴ Sikawa bótala. Boyebi lisusu emononeli ya lisanga ya Banje? Charlie, ngai. . . Yo oyo.

²⁶⁵ Likambo moko ezali kosalema na mposo oyo, nayebisaki bino ete bo. . . Ezali kosalema zinga-zinga na bino, kasi nazali komituna soki bomonaki yango.

²⁶⁶ Bomikaniseli emononeli ya lisanga ya Banje, ntango nalongwaki awa mpo na kokende na Arizona? [Losambo balobi: “Amen.”—Mok.] Bómikanisela *Ezali Ntango Nini, Mesie?* [“Amen.”] Bómikaniseli yango lisusu? Bótala, ezalaki kaka na lokito moko ya nkake, kasi Banje nsambo bamónanaki. Ya solo? [“Amen.”] Lokito moko ya nkake, Banje nsambo bamónanaki.

Namónaki Mwana-mpate ntango afungolaki elembo ya liboso, mpe nayokaki, lokola ezalaki mongongo ya nkake, mpe moko na bijali-na-bomoi minei alobaki, Yaka komona.

²⁶⁷ Bótala, nkake moko, baNsango Nsambo oyo esilaki kokangama na bilembo mpe ekokaki komonisama te kino na mokolo ya nsuka, na eleko oyo. Bomoni eloko nini nalingi koloba?

²⁶⁸ Sikawa, bosili komona eteni ya kokamwa ya mpóso oyo? Wana nde oyo Yango ezali. Wana nde oyo Yango ezalaki. Ezali moto te, mo—moto moko te, ezali nde Banje na Nkolo.

²⁶⁹ Botala, batatoli bazali misato, bafandi awa, eleki mpóso moko, mwa moke koleka mpóso moko, nazalaki kuna, mosika na bangomba, pembeni na Mexique, ná bandeko mibale oyo bafandi awa. Nazalaki kolongola baséndé, to banzúbe, na lokolo ya pantalon na ngai; mpe lokito moko eyókanaki, oyo tóloba, ezalaki lokola bangomba elingaki kobúkana. Sikawa, ezali ya solo. Nayebisaki bandeko na ngai ata moke te, kasi bamonaki bokesene.

²⁷⁰ Mpe Alobaki na ngai: “Sikawa mílégela. Kende na esti. Oyo nde ndimbola ya emononeli yango.” Bomoni? Sikawa, mpo bóyeba, Ndeko Sothmann azuaki nyama oyo akendeki koluka te. Bisó nde tokómaki koluka kozuela ye yango. Mpe Alobaki:

"Sikawa, na mpokwa oyo, lokola elembo mpo na yo, ye akozua nyama yango te. Osengeli komibulisa na ntango oyo mpo na Banje oyo bakoya epai na yo." Mpe nakómaki motema likoló-likoló, bino boyebi lisusu.

²⁷¹ Nazalaki na westi. Banje yango bazalaki kokende na esti. Mpe ntango bakómaki pembeni na ngai, namemamaki elongo ná bango, (bomíkaniseli yango lisusu?) na ngámbo ya esti.

²⁷² Mpe Ndeko Fred, azali awa na mpokwa oyo, azali motatoli, ná Ndeko Norman. Ntango tozalaki kozónge, nandimisaki mobali yango ete átikala mpo azua nyama na ye. Ezali bongo, Ndeko Sothmann? [Ndeko Fred Sothmann alobi: "Amen."—Mok.] Iyo, ye wana, ateleme kuna. Nandimisaki ye; kasi, ata bongo, Alobaki: "Akozua yango te." Natikálá koloba eloko moko te; nakendeki na ngai.

²⁷³ Eloko moko, tofandaki na mopanzi ya héma, mokolo oyo. . . Ozali komikanisela, Ndeko Sothmann. Mpe ngai, bobele ntango oyo mwa makambo ezalaki kolobama, nazalaki kotíá yo ná Ndeko Norman. . . Ndeko Norman azali wapi? Kuna. Nazalaki kokatisa bango ndai, ete báyebeza na bato te makambo oyo ezalaki kosalema te. Ezali bongo? [Bandeko balobi: "Amen. Ezali solo."—Mok.] Nabalukaki nde mpe nakendeki mosika na hema yango, ndenge *wana*? Ezali solo? ["Ya solo."]

²⁷⁴ Mpamba te, ezalaki nde mpo na likambo oyo, ezalaki mpenza mpo na yango, mpe koyeba ete nakokaki koloba yango te, kino ekokokisama, mpo náতা soki bato bakosósola yango.

²⁷⁵ Mpe bomónaki yango? "Mwanje moko azalaki wana," nalobaki, "azalaki Mwanje moko ya ndenge." Azalaki kobenda bokebi na ngai koleka bamosusu na Bango. Bozali komikanisela yango? [Losambo balobi: "Amen."—Mok.] Bazalaki na kati ya lisanga; misato na ngámbo na ngámbo, mpe moko na likoló. Mpe oyo azalaki pembeni na ngai, soki totángi longwa na loboko ya mwasi kino na oyo ya mobali, azalaki Mwanje ya nsambo. Azalaki kongenga mingi, azalaki na motuya mingi koleka mpo na ngai, koleka Bamosusu. Bozali komikanisela? Nalobaki: "Azalaki kovimbisa ntólo, *boye*, mpe azalaki kopumbwa na ngámbo ya esti" (bozali komikanisela) "ndenge wana." Nalobaki: "Ememáki ngai na likoló; etómbolaki ngai." Bozali komikanisela yango? ["Amen."]

²⁷⁶ Tala Yango oyo, oyo ná Elembo ya Nsambo, likambo oyo nazalaki komitunatuna bomoi na ngai mobimba. Amen! Bilembo oyo mosusu ezalaki na motuya mingi mpo na ngai, na ntembe te, kasi, oh, boyebi te ndenge Oyo ezalaki na motuya, mpo na mbala moko na bomoi!

²⁷⁷ Nabóndelaki, nabélelaki Nzambe. Na—na—na. . . Nsima na liyangani ya Phoenix. . . Bato nyonso oyo bazalaki kuna elongo ná ngai bayebi. Nazalaki na kati ya bangomba.

²⁷⁸ Na ntongo moko, nalamukaki mpe namatáki na Sabino Canyon, bangomba wana ya minene, ya kokoto-kokoto mpe molaí. Namatáki kuna na likoló. Nzela moko ya moke ezalaka kuna, na nsuka ya nzela, emataka kino na Ngomba Lemmon, na makolo, ezali na kilometre pene na ntuku mitano, ezali na metre pene na zomi ya neige kuna na likoló. Boye, namataki na ngomba yango, na ntongo-ntongo mpenza, liboso ntongo étana, nazalaki komata na mwa nzela yango, likoló na mabánga. Namiyokaki ete nakambamaki kobaluka *boye*. Nabalukaki, mpe namatáki mabánga minene lokola míno, oh la la, ba-metre nkama na nkama.

²⁷⁹ Mpe nafúkamaki na katikati ya mabanga yango. Nakitisaki Biblia *oyo*, mpe nakitisaki buku *oyo* . . . mwa kayé *oyo*. Nalobaki: “Nkolo Nzambe, emononeli oyo elingi koloba nini? Na—nazali—nazali. . .” Nalobaki: “Nkolo, e . . . Elakisi ete nakokufa?”

²⁸⁰ Bozali komikanisela, naye bisaki bino: “Nakanisaki ete ekokaki kolakisa ete nakokufa, mpo lokito moko eyókanaki na lolenge ete eningisaki ngai mpenza.” Bozali komikanisela yango. Bato boni bayebi yango, bayokaki yango? [Losambo balobi: “Amen.”—Mok.] Ee, ya solo, bomoni, bino nyonso. Mpe nakanisaki ete ekokaki kolakisa kufa na ngai.

²⁸¹ Nsima na yango, na biró, nalobaki: “Ezalaki nde . . . Ezalaki—ezalaki—ezalaki nini, Nkolo? Elakisi—elakisi nini? Elakisi ete nakokufa? Soki ezali bongo, malamú, nakoyebisa na libota na ngai te. Tika ete nákende na ngai, bomoni, soki mosala na ngai esili.” Mpe nalobaki. . .

²⁸² Sikawa, ezalaki nini? Kasi Atindaki litatoli, bozali koyeba lisusu naye bisaki bino ete ezalaki bongo te. Ezalaki nde kokende liboso ya mosala na ngai. Oh, oh, oh! Bosósoli yango?

²⁸³ Bomoni, mpe wana nafandaki na Sabino Canyon, Tata na Likoló ayebi oyo, kaka na bosolo mpenza ndenge bomoni wana kokokisama, Banje yango bakitaki mpe batátolaki Nsango moko na moko ndenge moko. Na bongo, boyebi soki Euti na Nzambe, to te. Eyebisamaki na bino liboso, na nzela na emononeli. Nakokaki koyebisa bino yango te, liboso mayangani éсила, mpo bapekisaki ngai kosala yango.

²⁸⁴ Na Sabino Canyon, nafandaki kuna na ntongo yango, natómbolaki maboko. Mpe ya ngai. . . Mopepe esilaki kokweisa mwa ekoti na ngai ya moindo. Ntango . . . Natelemaki wana, ná maboko ya kotombwama, nazalaki kobondela. Nalobaki: “Nkolo Nzambe, likambo oyo elingi koloba nini? Nazali kososola yango te, Nkolo. Násala nini? Soki ntango na ngai ya kozóngá na Ndako ekoki, tika ete námata awa, ezali esika oyo bakotikáláká komona ngai te. Nalingi te moto moko ásala matánga, soki nazokende. Na—nalingi ete libota na ngai bákanisa ete nakende ki kaka kotambola. Mpe bakomona ngai lisusu te. Bómba ngai esika moko boye. Soki nasengeli kokende na ngai, ee, tika ete nákende.

Ntango mosusu Joseph akomona Biblia na ngai awa, mokolo moko, tika ete ásalela Yango. Bomoni, soki nazali kokende na ngai, tika ete nákende, Nkolo.” Mpe nasémbolaki maboko. Mpe, na mbala moko, eloko moko ebétaki loboko na ngai.

²⁸⁵ Nayebi te. Nakoki koyeba te. Nalalaki mpongi nde? Nayebi te. To nakotaki nde na molimo? Nayebi te. Ezalaki emononeli? Nakoki koyebisa bino te. Eloko bobele moko oyo nakoki koloba ezali oyo ngai. . . Ezalaki kaka ndenge moko lokola Banje wana!

²⁸⁶ Mpe ebétaki loboko na ngai. Natalaki, mpe ezalaki mopanga. Ezalaki na esímbeli ya pauni, ezalaki kitoko mpenza; mpe eloko oyo ebatelaka loboko, likoló na yango, ezalaki ya wolo. Mpe mbeli ezalaki ya eloko moko lokola chrome, lokola paláta, kasi ezalaki mpenza kongenga. Mpe ezalaki mpenza na mopotú, na lolenge ya nsala, oh, la la! Mpe namilobelaki: “Ezali mpenza eloko moko ya kitoko mpenza!” Efandaki malamú mpenza na loboko na ngai! Namilobelaki: “Ezali mpenza kitoko mingi. Kasi,” nalobaki, “hé, ngai nabángaka biloko wana, mopanga.” Namilobelaki: “Nakosala na yango nini?”

²⁸⁷ Mpe na mbala moko Mongongo moko eyókanaki na esika yango, mpe eningisaki mabánga. Elobaki: “Ezali Mopanga ya Mokonzi!” Nsima na yango, bomoto na ngai ezóngaki.

²⁸⁸ “Mopanga ya Mokonzi.” Sikawa, soki Élobaka: “Mopanga ya mokonzi moko. . .” Kasi Elobaki: “Mopanga ya Mokonzi.” Mpe “Mokonzi” azali bobele moko, mpe ezali Nzambe. Mpe Azalaka na Mopanga moko, ezali Liloba na Ye, oyo ngai nabikelaka. Ya solo, e Nzambe, sunga ngai; wana natelemi awa, na eteyelo na Ye ya bulee, ná Liloba ya bulee oyo likoló na yango! Ezali Liloba! Amen! Oh, tozobika na mokolo moko ya nkembo! Ezali mpenza likambo monene! Bozali komona libombami mpe sekele? Ya Misato. . .

²⁸⁹ Etelemaki ngai wana, ntango likambo yango esilaki, Eloko moko eyelaki ngai mpe elobaki: “Kobanga te.” Sikawa, nayokaki mongongo te. Elobaki lokola na kati na ngai. Nasengeli bobele koyebisa bino solo, kaka ndenge esalemaki mpenza. Eloko moko eyelaki ngai na mpwasa, mpe elobaki: “Kobanga te. Oyo ezali Pull ya Misato wana.”

²⁹⁰ Pull ya Misato! Bozali komikanisela Yango? [Losambo balobi: “Amen.”—Mok.] Alobaki: “Bato mingi bamekolaki yo na likambo yango, oyo omekaki kolimbola. Kasi,” Alobaki, “komeka ata te, na Oyo.” Bozali komikanisela yango? Bato boni bazali komikanisela emononeli yango? [“Amen.”] Ee, esili sikawa. Etiami na bande, mpe bisika nyonso. Esalemaki eleki pene na mibu motoba, eleki mibu nsambo. Eleki mibu nsambo. Alobaki: “Komeka kolimbola Yango te.” Alobaki: “Oyo ezali Pull ya Misato, kasi nakokutana ná yo kuna na kati.” Ya solo? [“Amen.”] Alobaki: “Komeka te. . .”

291 Nazalaki wana, ná—ná mwa sapato moko ya babebé, ntango Ayebisaki ngai bongo. Alobaki: “Sikawa sálela Pull na yo ya liboso. Ntango okosala yango, mbisi ekolanda mpambu.” Alobaki: “Na nsima landela Pull na yo ya Mibale,” alobaki, “mpo Ekozala bobele mbisi ya moke.” Alobaki: “Na nsima Pull ya Misato ekokanga yango.”

292 Mpe batei nyonso bayaki zingazinga na ngai, balobaki: “Ndeko Branham, toyebi ete okoki kosala yango! Aleluya! Ndeko Branham!” Na esika wana nde nakangamaka ntango nyonso, ná etonga ya batei. Bomoni? Nalingaka bato. Balingaka ete ólímbole makambo nyonso, likambo *oyo*, likambo *wana*.

293 Mpe nalobaki: “Ee, ah, ah, ah,” nalobaki, “nayebe te.” Nalobaki: “Nayebe mayele nyonso ya kolóbo mbisi. Sikawa,” nalobaki, “sikawa, likambo ya liboso ya kosala... Basalaka boye. Soki omoni mbisi nyonso zinga-zinga; osengeli koningisa mpambu nokinoki.” Ee, wana mpenza nde mayele ya kolóbo mbisi. Boye, nalobaki: “Ningisa mpambu nokinoki. Sikawa, bomoni, ntango naningisi mpambu, mbala ya liboso, mbisi ebandaka kolanda yango.” Kasi ezalaki baoyo ya mikemike. Mpe wana ezalaki lokola oyo bango bazalaki kokanga.

294 Na bongo, na—nalobaki: “Nsima oko—okotia...” Mpe nabéndaki yango mpe ebimaki, na libóngo. Mpe nazuaki mbisi, kasi ezalaki lokola mposho moko likoló na mpambu, ezalaki kaka... ezalaki moke mpenza.

295 Na bongo natemaki wana, mpe Eloko moko elobaki: “Nayebisaki yo ósala yango te!”

296 Nabandaki kolela. Basinga nyonso ya ndobo elinganakilinganaki zingazinga na ngai, *boye*. Mpe nazalaki na... nazalaki wana, koleláká, ná motó nakitisá *boye*. Nalobaki: “E Nzambe! Oh, ngai... Limbisa ngai! Na—nazali zóba. Nkolo, ko... Limbisa ngai.” Mpe na—nasimbaki nsinga yango.

297 Mpe eloko oyo nasimbaki na loboko, ezalaki mwa sapato moko ya babebé, ya moke *boye*. Nasimbaki nsinga yango, ezalaki na monene ya mosapi na ngai, pene na centimètre moko, tóloba. Mpe lidusu ya nsinga ya sapato yango ezalaki moke lokola... ekokaki ata—ata millimètre na ndambo te, ntango mosusu, lidusu yango. Mpe nazalaki koluka kokótisa nsinga ya monene, ya centimètre mibale na ndambo, na mwa sapato yango. Ha!

298 Mongongo moko eyókanaki, elobaki: “Okoki kolakisa makambo ya molimo na babebé ya ba-Pantekotiste te.” Elobaki: “Sikawa, tika bango!”

299 Na mbala moko Amemaki ngai na likoló. Amatisaki ngai na likoló, mpe Afandisaki ngai na likoló mpenza, epai liyangani moko ezalaki. Ezalaki lokola héma to ndako-a-nzambe moko boye. Natalaki, mpe eloko moko lokola mwa engongolo ezalaki wana, mwa chambre moko ezalaki na mopanzi. Mpe namonaki ete Pole wana ezalaki kosolola na moto moko, likoló na ngai,

Pole wana oyo bozali komona kuna na fotó. Ezungulukaki mpe etikaki ngai, *boye*, mpe ekendeki likoló na hema yango. Mpe Alobaki: “Nakokutana ná yo kuna.” Mpe Alobaki: “Oyo ekozala Pull ya Misato, mpe okoyebisa Yango moto moko te.”

Mpe na Sabino Canyon, Alobaki: “Oyo ezali Pull ya Misato.”

³⁰⁰ Mpe makambo minene misato etambolaka ná Yango. Moko na yango ezipolamaki lelo, to, ezipolamaki lobi; mosusu ezipolami lelo; mpe ezali na likambo moko oyo nakoki kolimbola te, mpo ezali na monoko moko eyebani te. Kasi natelemaki mpenza wana mpe natalaki Yango mpenza. Mpe oyo ezali Pull ya Misato nde ezali koya. Mpe Molimo Mosanto ya Nzambe . . . Oh, la la!

Yango wana Likoló mobimba efandaki kimia.

³⁰¹ Sikawa, ezali malamú ná—nátelema awa, bomoni. Na—namoni nakoki kokóba kolobela Yango te. Bomoni?

³⁰² Boye, bóbosana yango te, Elembo ya Nsambo, ntina oyo Efungwamaki te. Bomoni, ntina oyo Amonisaki Yango te, moto moko te asengeli koyeba na ntina na Yango.

³⁰³ Mpe nalingi ete bóyeba, ete liboso náyeba ata Liloba moko na ntina na Yango, emononeli wana eyaki, eleki mibu ebele. Bozali komikanisela yango? [Losambo balobi: “Amen.”—Mok.] Mpe Yango oyo, kaka lokola oyo mosusu, Efandi mpenza malamú na Liloba, na esika na Yango mpenza. Mpe Nzambe ayebi motema na ngai, natikálá kokanisa na ntina na likambo ya ndenge Wana te, mpe tala Yango oyo. Ntango ekómi mosika koleka ndenge tozali kokanisa. Ah-ha. Oh, la la!

³⁰⁴ Yango elakisi ete Euti na Nzambe, mpamba te, bomoni, Ekokani malamú mpenza ná bilaka ya Nzambe, uta na nsuka ya—ya Nsango. Bótala. Bótala sikawa, mpo na Nsango ya ntango na nsuka, Elembo oyo. Nsima na nyonso, A—Asili komonisa Bilembo motóba nyonso, kasi Alobi eloko moko te na ntina na oyo ya Nsambo. Mpe Elembo ya ntango na nsuka, ntango Ekobanda, ekozala mpenza sekelé na mobimba, kokokana na Biblia, liboso Éyebana. Mpe bómikanisela, Emoniseli 10:1-7, 1 kino 7, mokapo ya 10:1 kino 7: “Na nsuka ya Nsango ya mwanje na nsambo, mabombami nyonso ya Nzambe ekoyebana.” Tokómi na ntango ya nsuka, bofungwami ya Elembo ya Nsambo.

³⁰⁵ Sikawa, nayébaki yango ndenge nini? Mokolo wana, ya Lomingo ya nsuka, eleki mpóso moko lelo, ntango nazalaki koteya likoló na “Zalá na komikitisa! Zalá na komikitisa! Bómikanisela, Nzambe asalaka na makambo ya mike-mike.” Nayebaki mpenza te oyo yango ezalaki kolobela. Sikawa namoni yango. Ezali na ndenge moko ya na komikitisa mpenza! Bokokanisa ete likambo ya ndenge wana ekomonisama na Vatican to . . . Kasi Eyei kaka ndenge eyaki na Yoane Mobatisi. Eyei lokola mbótámá ya Nkolo na biso, na ndako ya bibwele.

Nkembo na Nzambe! Ya solo mpenza, ngonga ekómi pene! Amen! Tokómi wana. Oh, la la!

³⁰⁶ Sikawa bomoni yango, Solo ya emononeli ya Nzambe, Banje nsambo oyo bamemaki ngai longwa na westi? Bautaki na westi, kozongáká na esti, komemáká ngai awa mpo na Nsango oyo ya mpokwa oyo. Oh, la la!

³⁰⁷ Sikawa, Mongongo ya nkake monene wana, ná etinda oyo epesamaki awa, esili komónisama, ete Yango. . . mpe etalisami polele ete Eútaki na Nzambe. Bókanisa naino sikawa. Nayebaki Bilembo oyo te, kasi esili komonisama na mpóso oyo. Ezali na moto moko akanisaki likambo yango, ete Banje nsambo yango ezalaki nde Oyo, ezalaki Nsango oyo elingaki kopesama, Banje oyo bazóngisaki ngai awa mpo na Yango? Bomoni?

³⁰⁸ Bómikanisela, Motindami ya nsambo azalaki. . . Batindami nsambo bazalaki. . . Oyo azalaki ndenge mosusu mpo na ngai, Mwanje ya nsambo, Azalaki kobenda bokebi na ngai koleka bamosusu nyonso. Sikawa, bomoni, batelemaki *boye*. Sikawa, tolingi ete bótala malamumu. Mpe ngai natelemaki *awa*, mpe nazalaki kotala baoyo mosusu. . .

³⁰⁹ Bomoni, moko, etonga ya liboso, bandeke ya mike, ná nsála elála mpenza. Bozali komikanisela? Mpe bango nyonso bapumbwaki na ngámbo ya esti. Etonga ya mibale, ezalaki bandeke oyo bazalaki kongenga koleka, minene koleka, bazalaki lokola bibengá, ná mapapu ya nsóngé. Bapumbwaki na ngámbo ya esti. Pull ya Liboso, Pull ya Mibale, na nsima oyo elandaki ezalaki Banje. Mpe wana. . .

³¹⁰ Nazalaki wana, mpe lokito yango eyokanaki. Nazalaki kotala na ngámbo *oyo*, ya westi, mpe Bango bayaki mpe bamemaki ngai na kati na Yango. Nayebaki lisusu eloko moko te. Mpe moko na Bango, ntango bazalaki koya, Oyo azalaki mpenza komonana ndenge mosusu mpo na ngai, ezalaki Oyo azalaki na. . . Azalaki na loboko ya mwasi, na esika oyo ngai nakotaki na kati ya lisanga yango. Kasi soki natángi longwa na loboko ya mwasi kino ya mobali, akokaki kozala Mwanje ya nsambo, bomoni, na ngámbo moko kino na mosusu. Sikawa, bómikanisela, Batindami nsambo.

³¹¹ Boyebi lisusu pyramide ya Libanga ya mpembe, na ndoto ya Junior Jackson, oyo nalimbolaki mpo na bino? [Losambo balobi: “Amen.”—Mok.] Bomoni? Bótala, na mpokwa oyo nakendeki, mpe ngai. . . Ndoto motoba elótámaki, mpe moko na moko ezalaki kotalisa likambo kaka moko. Na nsima emononeli yango eyaki, mpe etindaki ngai na westi. Mpe, Junior, azalaki kotala malamumu, wana. . . Bótala. Bótala ndenge ebongi be!

³¹² Sikawa, nazali—nazali na elikia mpe natii motema ete bino bozali kososola ete nazali komeka kopesa ngolu yango na Yesu Klisto, Oyo azali Mobandisi ya nyonso Wana. Mpe ntina bobele moko oyo boyóká ngai naino te koloba ndenge wana liboso,

na bomoi na bino, kasi ngonga yango ezali kobeleva. Bomoni? Bomoni? Bótala.

313 Sikawa kondimisa bino yango, mpo ékoka kofanda malamumu mpenza. Etikali moke, nakotika bino lisusu. Nayebi te epai nakokende. Nasengeli koteya Nsango-malamu na bisika mosusu. Kasi sikawa, mpo . . .

314 Okoki koloba: “Nasilá koyóká bilandá-landa nyonso ya ndenge wana.” Nayebi te; nakoki kosambisa moto mosusu te.

315 Nasengeli kosamba bobele epai na Nzambe mpo na oyo ngai . . . mpo na—mpo na ngai moko. Kasi nasilá nde koyebisa bino likambo moko na Nkombo na Nkolo, mbala moko, oyo ezalaki bongo te, na mibu nyonso oyo? [Losambo balobi: “Te.”—Mok.] Moto mosusu te akoki koloba bongo, mpo nalobaka yango ntango nyonso ndenge Ayebisaka ngai yango.

316 Sikawa bótika nálakisa bino ete oyo ezali mpenza solo, mpe nándimisa yango.

317 Sikawa bómikanisela: “Soki ezali na moto moko ya molimo to mosakoli moko, Ngai Nkolo nakosolola na ye na bimononeli, mpe Nakomitalisa epai na ye na bandoto.” Elingi koloba, kolimbola bandoto. Joseph, akokaki kolimbola bandoto, koloba mpe—mpe komona bimononeli. Ezali ya solo?

318 Sikawa bótala likambo oyo, ete, sikawa, ntango likambo oyo esalemaki, Junior azalaki wana na elanga oyo ezalaki na—ezalaki na pyramide moko ya monene, ndenge wana. Likambo moko ekomamáki likoló na mabanga, mpe ngai nazalaki kopesa bato emoniseli na Yango. Boye te, Junior? [Ndeko Junior Jackson alobi: “Ezali bongo.”—Mok.] Pene na mobu moko liboso ésalema.

319 Sikawa bótala likambo oyo elandi. Nazuaki libende moko boye mpe nakátaki Yango, mpe Libanga ya mpembe ezalaki na kati na yango, eloko moko te ekomamaki likoló na Yango. Mpe, na ntango yango, nabandaki kokende na westi. Mpe nayebisaki bango nyonso, nalobaki: “Bókende na westi te. Bótikala awa mpe bótalaka Yango kino nakozonga.” Nakendeki na westi, mpe nayokaki lokito yango; nazóngaki na esti, ná Molimo Mosanto kolimboláká Liloba oyo ekomami te. Sikawa, soki mobimba na yango ezali mpenza Nzambe na-Nguya-nyonso te, nalingi ete bóbeya oyo yango ezali.

320 Mpo na nini nazali komeka koloba likambo oyo, baninga? Ezali mpo na kotalisa bino ete tokómi na ntango ya nsuka. Sikawa, soki makamambo mosusu oyo elóngobanaki be mpenza ná Liloba, Oyo mpe elongobani be mpenza ná Liloba! Tokómi awa. Tokómi na nsuka, baninga.

321 Kala mingi te, “ntango ekosila.” Ba-milió ya bato bakobúngisa bomoi na bango. Ba-milió ya bato, oyo lelo bakanisaka ete babikisámá, bakotángama kati na baoyo bakokufa na eleko ya bombe atomique. Tozali kobika na ngonga

ya nsuka. Na ngolu ya Nzambe na-Nguya-nyonso, na lisungi na Ye mpo na bato na Ye, mpo bákoka kozela na motema lúkú-luku komonana ya Klisto, oyo ekómi pene! “Etikali ntango boni, Ndeko Branham?” Ntango mosusu mibu ntuku mibale; ntango mosusu na mibu ntuku mitano; ntango mosusu na mibu mokama. Nayebi te. Mpe ntango mosusu lobi na ntongo; ntango mosusu na mpokwa oyo. Nayebi te. Mpe moto nyonso oyo alobi ete ayebi, bazali na libunga. Bomoni? Bayebi te. Nzambe kaka nde ayebi.

³²² Sikawa bótala. Ya solo mpenza, liboso na Nzambe, nazali koloba Solo, ete makambo Oyo esosolisami na ngai na molimo, esosolisami na nzela na Molimo Mosanto. Mpe moko na moko na Yango, esili kotalisa esika na Yango na Biblia.

³²³ Sikawa, sekele monene oyo ezali na nsé ya Elembo oyo, nayebi yango te. Nayebi yango te. Nakokaki kosósola yango te. Nakokaki koyeba Yango te, koyeba mpenza oyo Yango—oyo Yango elobaki, kasi nayebi ete ezalaki baNkake Nsambo wana, oyo eyókanaki moko nsima na mosusu, oyo engulumaki mpenza mbala nsambo. Mpe Ezipolamaki mpo na kotalisa eloko mosusu oyo namonaki. Na bongo, ntango namonaki Yango, nalukaki ndimbola na yango. Elekaki wana na lombángu, mpe nakokaki kosósola Yango te. Ezali mpenza ya solo. Bomoni? Ngonga ekoki naino te mpo na Yango.

³²⁴ Kasi, Ezali kokende kokóta na zolongano wana, bomoni. Ezopusana penepene. Boye, eloko oyo bosengeli kosala ezali ete bómikanisela ete nalobeli bino na Nkombo ya Nkolo. Bómilengela, mpo boyebi te ntango nini likambo moko ekoki kosalema.

³²⁵ Sikawa, ntango ekotiamana na bande, yango nde Ezali kosalema, ntango mosusu baninga na ngai nkóto zomi bakotika ngai mpenza mpo na Yango. Mpamba te, bakoloba ete “Ndeko Branham azali koluka komitia ye moko, komikómisa mo—mosali to mosakoli, to eloko moko boye, liboso na Nzambe.” Bótika náyevisa bino, bandeko na ngai, wana ezali libunga.

³²⁶ Nazali bobele koyebisa bino eloko oyo namonaki mpe eloko oyo bayebisaki ngai. Sikawa, bino bó—bósala nyonso oyo bolingi. Nayebi te nani ako . . . likambo oyo ekosalema. Nayebi yango te. Nayebi kaka ete Nkake Nsambo yango nde esímbe libombami yango. Lola efandaki kimia. Moto nyonso asósoli? [Losambo balobi: “Amen.”—Mok.] Ntango mosusu ntango ekoki, ntango mosusu ngonga ekoki sikawa, ete moto monene oyo tozozela ákota na mosala akoki kokóta na mosala.

³²⁷ Ntango mosusu lotómo oyo, oyo namekaka kozongisa bato na Liloba, esili kotia mobóko; mpe soki ezali bongo, nakotika bino mpo na libela. Tokozala awa biso mibale te, na ntango moko. Bomoni? Soki ezali bongo, ye akomata; ngai nakokita. Nayebi te.

328 Kasi nazwi litomba malamumu, na Nzambe ya kotala mpe komona oyo Yango ezalaki, bomoni, komona likambo yango kozipolama wana mpenza. Sikawa, ezali mpenza Solo.

329 Mpe nandimisami ete bosili komona makambo oyo esili kosalema na mpóso oyo. Nandimisami ete bomónaki elenge Collins moke oyo aláláki wana, pene na liwa, na mpokwa wana; ná mwana mwasi ya moke, oyo azalaki na leucémie.

330 Bokonzi ya Nzambe ezali koya. Mpe malembe-malembe, Ebandi kolongwa na négatif mpe kokóma positif, ndenge ezalaka. Sikawa, oyo wana esengelaki kobetisa bato libaku te. Longwa na kolóngisama, kino na kobulisama, kino na libatizi ya Molimo Mosanto, mpe na nsima *awa, awa*. Bomoni? Tozali kaka kopusana mpembeni na Nzambe koleka, ntango nyonso.

331 Bozali komona te, bino batei ya ba-Metodiste, ete nsango na bino ya kobulisama ezalaki likoló na oyo Luther ateyaki?

332 Bino ba-Pantekotiste, bozali komona te ete nsango na bino ya libatizi ezali mosika, koleka oyo ba-Metodiste bateyaki? Boyebi oyo nalingi koloba?

333 Oh, tomóná ebele na makambo kosalema! Ezali solo. Mpe soki ezali na moto oyo ayinaka mabe, mpe bato balobaka makambo oyo ezali mpenza lokuta kasi Solo te, ngai nayinaka yango.

334 Kasi na—nalingaka mpenza Solo ya solosolo, ata Etungisi bato na ngámbo *oyo* to na ngámbo *wana*. Soki Ezali Solo, sukasuka Nzambe akolakisa ete Ezali Solo. Soki Asali yango te, moko na mikolo oyo kala mingi te, na bongo emononeli na ngai ezalaki solo te. Sikawa bomoni epai wapi namitiaki ngai moko.

335 “Ekosalema ntango nini, Ndeko Branham?” Nakoki koyebisa yo te. Nayebe te.

336 Kasi, moko na mikolo oyo, soki totikali kokutana lisusu na mokili oyo te, tokokutana kuna na—na Kiti na Esambiselo ya Klisto. Nde bokomona ete na kati ya chambre yango, emoniseli oyo eutaki na Nzambe, kaka lokola nyonso mosusu wana, ete Yango... Moko na mabombami ya Elembo yango, ntina oyo Yango emonisamaki te, Ezalaki baNkake Nsambo oyo eyokisaki mingongo na Yango. Mpe Ezali bongo, ebongi be mpenza. Mpamba te, moto moko te ayebi eloko moko na ntina na Yango. Ekomamaki ata te. Boye, tokómi na ntango ya nsuka. Tokómi awa. Natondi Nzambe mpo na Liloba na Ye.

337 Natondi Ye mpo na Yesu Klisto. Mpo, soki Átindaka Ye te lokola—lokola mbeka mpo na kolongola masumu na biso, biso nyonso tolingaki kozala na kati ya potopoto ya masumu, na elikia te. Kasi, na ngolu na Ye, Makila na Ye—na Ye epetolaka biso na masumu nyonso. Kaka lokola litangá ya encre na kati ya katini ya mai ya Clorox, bokomonáká lisusu encre yango te. Ntango toyamboli masumu na biso, ebwakamaka na kati

ya Makila ya Yesu Klisto; bakoyeba yango lisusu ata moke te. Nzambe abosani yango; tosalaki yango ata moke te. Mpe na ntango nyonso oyo Mbeka yango ezali wana mpo na bolimbisi ya masumu na biso, na bongo esili. Yango mpenza, bomoni. To—tozali lisusu basúmuki te. Tokómi Baklisto, na ngolu na Nzambe. Bómikanisela, na ndenge na biso moko, tolingaki ntango mosusu kozala mabe ndenge tozalaka. Kasi, bomoni, ngolu na Nzambe esili kopésamela biso, yango nde ekómisi biso oyo tozali lelo, bandeko Baklisto mibali mpe basi.

³³⁸ Oyo ezalaki mpóso moko ya kafukafu mpo na ngai. Nalembi. Makanisi na ngai elembi. Mpamba te, na—nazali...ná oyo nyonso nakokaki kosala. Likambo moko ya kokamwa ezalaki kosalema mokolo na mokolo. Ezalaki kokamwisa ngai; nazalaki kokóta na biró yango, mpe kozala kuna miniti moke, mpe komona Eloko moko kobóngola ngai na mobimba, mbala moko.

³³⁹ Mpe, awa, nakóti kuna mpe nazui maye nakomaká. Nazui babuku ya Dr. Smith, Uriah Smith, ná, oh, ba—bakomi ya ndenge na ndenge mpe nyonso wana, mpe natángi yango, natángi babuku na bango. Nalobi: “Sikawa Elembo ya Motoba yango oyo. Elembo ya Minei yango oyo. Sikawa, moto oyo alobi nini? Akokaki koloba: ‘Ee, Ezalaki *boye*, *boye* to oyo *mosusu*.’” Natali awa mpe natángi oyo ya mokomi mosusu. Ye akokaki koloba ete ezali *boye-na-boye*. Mpe ezalaki lokola ngai...Ezalaki mpenza kolóngobana te. Bomoni?

³⁴⁰ Bongo nazalaki kokanisa: “Ee, Ezali nini, Nkolo?” Mpe nazalaki kotambola-tambola mwa moke na kati ya biro. Nafukami mpe nabondeli. Nazongi mpe nazui Biblia; nafandi, natángi. Kokende kozonga.

³⁴¹ Bongo, na mbala moko, ntango nafandi kimia, tala, Ezalaki kofungwama ndenge wana. Na bongo, nakozua ekomeli nokinoki, mpe nakobanda kokoma Yango ndenge wana, nyonso oyo nazalaki komona mpe kosala. Kolandeláká Yango, ndenge wana, kino nakosilisa kokoma Yango.

³⁴² Na nsima nakozua mokolo mobimba mpo na koyekola Yango, mpo náyeba soki Yango ekanaki na mobimba ná Makomi. Boye: “Bómeke makambo nyonso.” Bomoni? Nazalaka na Yango awa.

³⁴³ Nazalaki komilobela: “Sikawa, bato mingi bamóná bimononeli. Bato mingi bazuá bimoniseli.” Soki ekeseni na Liloba, tika yango; ya solo, tika yango.

³⁴⁴ Sikawa, sikawa, na nsima nakoyekola nyonso Oyo *boye*, koyekola yango *boye*. Nakokoma mwa makambo awa. Nazalaki komilobela: “Ee, sikawa, losambo bakosepela koyoka yango, mpo ekokani *awa* mpe ekokani *awa*. Sikawa, tótala, likambo nini elobami *awa*? Iyo. Mpe, iyo, yango oyo, *awa*.” Bomoni?

³⁴⁵ Mpe nakozongisa Yango kati na Biblia mobimba, mpe kokokanisa nyonso wana, na mpóso mobimba. Tala Yango wana,

na ba-bande. Bokoki kozua yango. Mpe nasali yango na boyebi na ngai nyonso, na boyokani na bondeko ya Boklisto, ngolu na Nzambe mpo na bato nyonso, na nzela na Yesu Klisto. Nasili kosala mpenza oyo nakokaki kosala mpenza.

³⁴⁶ Bozalaki moko na ba-kelasi ya malamú koleka. Moto moko te akokaki kofanda malamú koleka bino. Bino nyonso bozalaki kokóma na ngonga ya liboso ya moi, kino na ngonga ya mitano, na ngonga oyo bazalaki kofungola losambo mpo na kokótisa . . . mpo bato bákota. Bozalaki kotelema na malili; bozalaki kofanda na neige; bozalaki kosala nyonso; kotelema mpembeni na bitutu, kino makolo na bino ezalaki kosala mpasi. Nazalaki komona mibali oyo bafandi. Bazalaki kotikela basi bisika ya kofanda, mpe bato ndenge na ndenge bazalaki wana, ndenge wana, bafandaki zinga-zinga. Namilobelaki: “Nkolo, nyonso . . .”

³⁴⁷ Oyo ezalaki mpóso moko ya kokamwa. Likambo yango na mobimba ezalaki ndenge mosusu, tóloba, komona bato koya, komona bango kotélema zingazinga na libanda, na maninisa, liboso na bikuke, kuna na nsima, zinga-zinga bisika nyonso, koyokáká. Mpo na oyo etali kozala molobi, nazali mosika na kozala molobi. Na—nazali na mayele oyo ekoki mpenza, mpo na koyeba ete nazali yango te, ete nazali molobi te. Kasi mpo na nini bato bafandaka mpo na koyoka ndenge wana? Mpo na nini basalaka bongo? Bayaka koyoka moto lokola ngai te. Kasi bayaka mpo ezali na Eloko moko na kati, oyo ezali kobenda bato. Ya solo. Bomoni? Ezali na Eloko moko na kati, oyo ezali kobenda bango.

³⁴⁸ Ndenge mwasi na ngai azalaki kotelema awa na etumbelo mpo na koyemba, ntango nabandaki:

Baúti na Esti ná Westi,
Baúti na mikili ya mosika,
Mpo na kosepela ná Mokonzi, mpo na kolia na
mesa na Ye;
Baleki-nzela yango bapambolami mpenza!
Na kotáláka elongi na Ye ya bulee
kongenga na Pole ya Bonzambe;
Bapambolami, baoyo bazui ngolu na Ye,
Bazali kongenga lokola pauni na motóle na Ye.

³⁴⁹ Bókanisaka yango ntango nyonso, “Kozala pauni na Motóle ya Yesu Klisto.” Polo alobaki na Lingomba: “Bozali—bozali mabanga ya ntalo, to, pauni ya Motóle na Ye.” Tolingi kozala bapauni ya Motóle ya Yesu Klisto.

³⁵⁰ Tolingi ata moke te kotia moto kati na yango. Bóbosana nyonso na ntina na ngai. Nazali ndeko na bino, mosumuki oyo abikisami na ngolu, nabongi te kozala na bomoi. Ezali mpenza solo. Nazali koloba yango te mpo na kozala na komikitisa; ezali makambo ya solo. Kati na ngai, eloko moko ezali te, eloko ya motuya ata moko te, ata moke te.

³⁵¹ Kasi ngolu na Nzambe nde epesi nzela na miso na ngai oyo ebandi kokufa, ete étala na ngámbo mosusu ya ridó ya ntango mpo émona makambo yango, kuna, mpe názonga.

³⁵² Ntango nazalaki mwana moke, nazalaki kolinga bato. Nazalaki ntango nyonso na mposa ete moto moko álinga ngai mpe álobisa ngai. Moto moko te azalaki kosala yango, mpo na lokumu mabe ya libota na biso. Moto moko te alingaki kolobisa ngai.

³⁵³ Kasi ntango namipesaki na Nzambe, na bongo... Bato ya libota na biso baútá na Irlande, nazaláká komilobela: “Ntango mosusu... Lokola bango nyonso bazalaki ba-Katoliko, ntango mosusu ezalaki Yango.” Nakendeki *kuna*, mpe Azalaki na lolenge moko boye. Mpe nakendeki na lingomba ya ba-Batiste ya Liboso, mpe Azalaki na lolenge mosusu.

Nalobaki: “Nkolo, lolenge moko esengeli kozala, oyo ezali ya solo.”

Mpe Eloko moko elobaki: “Ezali Liloba.”

Nakangámá na Liloba yango. Bótala bimononeli nyonso, bisika nyonso.

³⁵⁴ Mokolo oyo natiaki libanga ya liboso kuna, natiaki yango na kati kuna, nakomáki kuna likambo oyo Alakisaki ngai na ntongo wana, na emononeli. “Sakola liloba, sálá yango na molende na eleko ya malamú, na eleko ya mpasi; pámbela na motema molai ná Mateyo. Mpamba te ntango ekoya, oyo bakoboya kondima Mateyo ya sembo; kasi na kolandáka bamposa na bango moko, bakozua balakisi ebele mpo na konyomitisa matoi na bango; mpe bakopesa mokongo na Sóló, bakolanda masapo.” Mpe namonaki banzete nyonso mibale wana, natelemaki mpembeni na yango, ezalaki mpenza kosala likambo yango moko. Ya solo. Mpe tokómi wana. Ezali solo. Mpe, sikawa, boko... .

³⁵⁵ Bómikanisela. Bótika ete nálendisa bino lisusu. Bólobaka “matondi” na moto moko te, ata moke te. Bólobaka bongo te, bókánisaka bongo te mpo na motei moko to nani, moto ya mokili oyo; ezali na eloko moko te ya malamú na kati na ye. Mpamba te, ezali te. Ata soko azali nani. Kati na moto, eloko ya malamú ezali te. Ya solo.

³⁵⁶ Soki liboke moko ya bakelelo etiami awa, mpe moko na yango esengelaki kobeta miziki moko boye, moto nde... Bakelelo yango elobaka ata moke te. Moto oyo akoki koyula kelelo yango nde ayebaka eloko oyo akosala, oyo azuaka kelelo yango. Kelelo yango ezali na eloko moko te ya kosala ná yango. Lokito eutaka nde na mayele oyo ezali nsima na yango. Ya solo. Boye, bakelelo nyonso ezalaka ndenge moko.

³⁵⁷ Bato nyonso bazali ndenge moko. Baklisto nyonso bazali ndenge moko. Kati na biso, bato minene bazali te. Bisó tozali mibali minene te, basi minene te. Bisó nyonso tozali bandeko

mibali mpe bandeko basi, biso nyonso ndenge moko, na lisanga yango moko. Tozalaka “monene” te. Moto moko te akoki komiyeisa moto monene koleka moninga, azali na eloko ata moko te ya kosala yango. Te, misie. Kasi biso nyonso tozali kaka bato.

358 Bómeka kolimbola makambo te. Bómeka kosala eloko mosusu te koleka, bóbika kaka bomoi ya sembo koleka, kopésáká masanzoli mpe lokumu na Yesu Klisto. Moto nyonso asósoli yango sikawa? [Losambo balobi: “Amen.”—Mok.] Mpe bólinga Ye na motema mobimba. Bokosala yango?

Nalingi Ye, (Nakosala yango!) nalingi Ye
Mpo Alingaki ngai liboso
Mpe asómbaki lobiko na ngai
Likoló na Ekulusu.

359 Nzambe ásanzolama! Moto nyonso asósoli malamú mpenza? [Losambo balobi: “Amen.”—Mok.] Moto nyonso andimi? [“Amen.”] Bómikanisela ntango nabandaki: “Nani andimaki litatoli na biso? Loboko na Nkolo emonisami epai ya nani?” Amonisi yo mawa na Ye ná boboto na Ye? Amen. Bóbosana te, bólinga Ye na motema mobimba.

360 Nazozonga epai na ngai sikawa. Nakoya lisusu awa, soki Nkolo alingi, pene na mokolo ya liboso na sanza ya Motoba.

361 Ntango mosusu, soki Nkolo atii yango na motema na ngai, ntango mosusu na ebandeli ya eté oyo, lokola na sanza ya motoba to mpembeni na yango, ntango mosusu na ebandeli ya automne, soki Nkolo aumeli, nakosepela koya lisusu awa mpe koteya mpokwa nsambo lisusu, likoló na baKelelo Nsambo ya nsuka. Bokosepela na yango? Bokosepela na yango? [Losambo balobi: “Amen.”—Mok.] Bokobondela mpo na ngai, mpo Nzambe ásungá ngai? [“Amen.”] Malamú.

362 Kino nakokutana na bino lisusu, bómikaniselaka loyembo kitoko ya kala oyo:

Nalingi Ye, nalingi Ye
Mpo Alingaki ngai liboso
Mpe asombi lobiko na ngai
Likoló na Ekulusu.

363 Sikawa nalingi ete bógumba motó. Nalingi kobondela mpo na bino. Liboso mokengeli ásilisa liyangani, nalingi kobondela mpo na bino.

364 Tata na biso na Likoló, tika ete bato, Nkolo, básosola. Mpo, nandimisami mpenza ete bamosusu basósoli te. Kasi, Tata, tika ete ba—báyeba ntina oyo tozali kolanda. Mpe tika ete básosola, Tata, ete—ete ezali ngolu na Yo mpo na bango nde makambo oyo emonisami. Mpe nalingi kotóndo Yo, Nkolo, mpo na boyebi, ndenge toyebi makambo oyo Osili komonisa biso.

³⁶⁵ Mpe nabondeli mpo na moto nyonso oyo azali awa, moto nyonso oyo azalaki koya na mayangani. Soki bamosusu bazali, oyo bandimi te, Nkolo, sálá ete bákóma bandimi.

³⁶⁶ Nabondeli mpo na bato nyonso oyo bakoyoka Mateya yango na nzela ya bande. Mpe soki esalemi ete Ekwei, na ntembe te Ekokweya kati na bandako mpe bisika oyo bazangi kondima mingi bakondimana na yango te; kasi, Tata, nabondeli mpo na moko na moko na bango, ete liboso báloba liloba moko ya kotúka, bákoka liboso kofanda mpe kolukaluka na Makomi, kokokana na oyo euti kolobama, na nsima nde báloba na Yo ete bazali mpenza sémbo mpe balingi koyeba soki oyo ezali Solo, to te. Mpe nabondeli mpo na bango, Tata.

³⁶⁷ Mpe nabondeli mpo na baoyo batelemaki mpembeni-mpembeni na bitutú oyo, baoyo batelemaki libanda, baoyo bafandaki na mituka na bango, mpo na bana mike, mpe mpo na baoyo nyonso bayaki awa. Mpe na bango nyonso, Nkolo, nabondeli mpo na bango.

³⁶⁸ Mpe nabondeli ete mabondeli na ngai éyanolama, ete Ópambola bango. Liboso, Nkolo, pesa Bomoi ya Seko na moko na moko. Nabondeli ete ata moko na bango te ábunga, ata moko te.

³⁶⁹ Mpe sikawa, Tata, toyebi te ntango nini likambo monene oyo ekosalema. Kasi wana tozali komona bilembo oyo komonana, ná makambo ya Makomi kokokisama, yango ezali kopesa mitema na biso móto oyo ezangi meko. Mpe nabondeli, Tata Nzambe, ete Ósunga biso.

³⁷⁰ Nabondeli ete Ósunga mokengeli molingami na biso, Ndeko Neville. Sala ye ete, Nkolo, átonda na ngolu, átonda na nguya mpe ná lisosoli, mpo ákoka kozua Bilei oyo ebómbami mpe áleisa bana-mpate ya Nzambe.

³⁷¹ Nkolo, nabondeli ete Ótia bokono mosika na biso. Tiká ete esalema, ete ntango bato bakozua bokono, bámikanisela Makila oyo ekoká na nyonso, ya Nkolo Yesu, oyo ezali likoló na etumbelo, mpo na bolimbisi ya masumu. Mpe nabondeli ete bábikisama mbala moko.

³⁷² Nabondeli ete Ótia mosika na bango nguya ya Satana, mpo na kolembisa bango, to komeka komisalela ba-secte. To, longóla mosika na bango nguya nyonso ya moyini, Nkolo. Búlisa biso mpo na Liloba na Yo. Sálá yango, Nkolo.

³⁷³ Nsima na yango, Nkolo, nabondeli ete Ósunga ngai. Na—na—nabandi konuna, Nkolo. Nayebi ete natikali lisusu na mikolo mingi mpenza te. Nabondeli ete Ósunga ngai, kotika ngai názala solo, Nkolo, na boyengebene mpe bosembo, mpo nákoka kozala na makoki ya komema Nsango na bisika nyonso oyo ebongisámá mpo na ngai komema. Mpe wana ntango ekosengela ete nákende kopema, mpe nákita kuna na Ebale, mpe mbonge ekobanda komema ngai, e Nzambe, tika ete nákoka kopesa Mopanga oyo

ya kala na moto mosusu, oyo akozala sémbó ná Yango, Nkolo, mpe akomema Solo yango. Sálá yango, Nkolo. Mpe, kino ntango yango, sunga ngai názala na makasi, na nzoto kolongono, mpe na mpiko.

³⁷⁴ Sunga losambo na ngai. Pambola biso elongo, Nkolo. Tozali ya Yo. Tozali koyoka sikawa ete Molimo na Yo ezali katikati na biso. Tondimi ete Okoyanola na mabondeli na biso. Mpamba te, tomipesi epai na Yo, ná Liloba na Yo, mpo na mosala mpo na mikolo na biso oyo etikali, na mokili oyo, na Nkombo ya Mwana na Nzambe, Yesu Klisto, Mobikisi na biso ya bolingo, mpo na nkembo na Ye. Amen.

Na... (Nzambe ápambola bino!)... nalingi Ye
(na motema mobimba),
Mpo Alingaki ngai liboso.

³⁷⁵ Nzambe ápambola yo, Ndeko Neville...?... Tíkala na esika ya mosala...?...

ELEMBO YA NSAMBO EZALI KOKÓBA

³⁷⁶ [Bouti kosilisa koyoka *Elembo Ya Nsambo* ya ebandeli, ndenge eteyamaki na mobimba na yango, mokolo ya Lomongo na mpokwa, mwa 24 na sanza ya misato, na mobu 1963, na Branham Tabernacle, na Jeffersonville, na Indiana. Ndeko Branham alingaki te ete bande oyo ya ebandeli ébima. Na mokolo oyo elandaki, mokolo ya lendi, mokolo ya 25 na sanza ya misato, na mobu 1963, Ndeko Branham akendeki na chambre ya motel ya Ndeko Fred Sothmann ná Ndeko James Maguire, baoyo, na ntango wana, bazalaki kosála ba-bande. Ndeko Branham alobaki na bandeko oyo: “Nalingi te ete liteya oyo ébima ndenge ezali.” Nsima na ye koyoka bande yango ye moko, apesaki mitindo na bandeko yango ete bátelemisa bande yango na esika moko boye, mpe na esika yango (na ebandeli ya paragraphe 261), atiaki eteni ya sika na bande, ya miníti pene na ntuku mibale (paragraphe 377-415). Eteni ya sika yango nde etiamaki na nsuka ya oyo ya ebandeli (paragraphe 261-373). Bobele bande yango ya *Elembo Ya Nsambo* nde ebimáká kino na mobu 1966. Nsima na Ndeko Branham kokende, likita ya William Branham Evangelistic Association, bango nyonso, na bomoko bayokanaki ete báximisa bande oyo esalemaki na ebandeli, na tabernacle. Kobanda ntango wana, ba-bande nyonso mibale ekómá kopesama na bato nyonso. Tosili kotia sikawa nsango ya Ndeko Branham, oyo ebakisami, na bande bobele moko, na *Elembo Ya Nsambo* oyo ya ebandeli. Mongongo oyo bokoyoka sikawa ekozala ya ndeko Branham, na chambre ya motel, mokolo ya Lendi, mokolo ya 25 ya sanza ya Misato, na mobu 1963,—Mok.]

³⁷⁷ Ekozala malamu ndenge ayebi eloko moko te na ntina na Yango. Mpamba te, soki áyébaka, boye alingaki komekola Yango. Wana nde lolenge mabe na ye ya kosala makambo.

³⁷⁸ Boye, na yango, Nzambe abómbáki Yango malamumu mpenza mosika na miso ya mokili mobimba, ata na Likoló, na lolenge ete makoki ya kosósola Yango ezali te, bobele soki Nzambe Ye moko alingi komonisa Yango.

³⁷⁹ Sikawa nalingi ete bótala malamumu, na mpokwa oyo, ete na Elembo ya Motoba, ntina e—ezalaki misato na Elembo ya Motoba.

Ntina ezalaki misato na babuti-mpunda.

³⁸⁰ Ntina ezalakaka misato na makambo nyonso wana. Ezongisi biso na misato. Mpe na nsambo lisusu, bomoni, Bilembo Nsambo, Mbeki Nsambo, mpe bongo na bongo. Sikawa, kati na bamisato ná bansambo nde mituya ya mathématique ya Nzambe ezalaka, ya komonisa Liloba na Ye.

³⁸¹ Sikawa, soki botali malamumu, ndakisa, ba—ba—babuti-mpunda, ezalaki na bampunda misato oyo ebimaki. Moko na yango ezalaki ya mpembe, moko ezalaki ya motane mpe moko ezalaki ya moindo. Na bongo, mpunda ya minei, ee, nyonso misato esanganaki elongo. Bomoni, ntina misato.

³⁸² Sikawa, Nzambe asalaki ndenge moko. Nzambe asalaki ndenge moko ntango Atindaki nkosi na Ye, oyo ezalaki Liloba na Ye, mpo na kobundisa motemeli-na-Klisto.

³⁸³ Na nsima tomonaki ete Atindaki ngombe na ntango ya—ya eleko ya monyoko, nyama ya mbeka. Mpe na eleko ya monyoko oyo, yango nde oyo bato nyonso bakokaki kosala, ezalaki kaka kosala mosala, lokola moombo, mpe komipesa mbeka.

³⁸⁴ Na nsima tomonaki, na eleko elandaki, oyo ezalaki eleko ya ba-reformateur, Nzambe atindaki bwanya ya moto, Ezali na bomoi oyo motó ezalaki lokola moto, yango ezalaki nguya oyo etambolaki na kati ya ba-reformateur.

³⁸⁵ Sikawa botalaki yango malamumu? Nyonso . . . Kokamwa te ete bato ya eleko oyo bazali naino kobika na makambo oyo batikaki, ndenge ezalaki kosalema na eleko ya ba-réformateur, mpo bamonaka makambo kaka ndenge ba—bakonzi ya mangomba bamonaka yango. Bamonaka yango ndenge etéyámaka na makindo na bango. Oyo wana ezalaki lolenge ya Nzambe na eleko moko, kasi biso tosili koleka eleko yango.

³⁸⁶ Sikawa tozali na eleko ya mpongo, emoniseli esengeli komonisama, mobimba na yango. Sikawa bókokanisa yango na Emoniseli mokapo ya 10, molongo ya 1 kino 7. Mpe tokomona awa na Emoniseli yango, awa na Emoniseli 10:1 kino 7, ete: “Na mikolo oyo Nsango ya mwanje na nsambo ekoyula, mabombami nyonso ya Nzambe esengeli kosila.”

³⁸⁷ Sikawa tomonaki mpe, na likambo oyo, ete Elembo ya Motoba, oyo esili kofungwama, ezalaki na ntina misato. Sikawa, bantina yango ezalaki boye.

388 Likambo ya liboso ezalaki, ete mongondo oyo alálaki mpongi asengelaki koleka na eleko ya Monyoko mpo na kopétolama. Asengelaki kopétolama na masumu na ye ya kozanga kondima mpe ya koboya Nsango. Esalemaki nde na eleko ya Monyoko. Tomoni bango lisusu awa na Emoniseli 7, na katikati ya mokapo ya 6 ná ya 7, ete asilaki kopetolama, mpe basilaki kopesa ye bilamba. Sikawa, ye azali Mwasi na libala te. Kasi ezali lingomba, bato ya peto, oyo—oyo—oyo bazuaki libaku te, ntango mosusu, ya koyamba Nsango, to, na lolenge moko boye, babomamaki miso na basakoli ya lokuta. Mpe ba—bazuaki libaku malamau te, kasi bazali mpenza sembo na motema. Mpe Nzambe ayebi mitema na bango. Mpe awa nde bapetolami, na ntango yango.

389 Soki botali malamau, ntango mosusu ya kopetolama, wana ekozala mpo na Yisraele, ntango bakosangana. Yango nde ntina ya mibale. Nzambe akopetola Yisraele na eleko ya Monyoko. Kati na ba-milió ya bato oyo bakosangana kuna, ekozala na bato nkóto mokama na ntuku minei na minei oyo bakoponama, bango mpe bakopetolama. Nzambe akopetola Yisraele.

390 Botala, mabelé mobimba esengeli kopétolama. Likambo moko ekosalema na lolenge ete sánzá, minzóto mpe bokelamu nyonso ekopétolama. Bomoni yango? Mabelé ekomiyeisa ya sika, ekopetolama, ezomilengela mpo na Millénium. Millénium ezali koya. Mpe, bomoni, nyonso oyo ezali na mbindo kati na yango esengeli kopetolama na ntango ya Elembo ya Motoba.

391 Sikawa, sikawa, bomoni? Na bofungwami ya Elembo ya Nsambo oyo, ezali mpe na mabombami misato. Oyo, nazali na . . . nakoloba mpe nasili koloba, ete ezali libombami ya baNkake Nsambo. BaNkake Nsambo na Likoló nde ekofungola libombami yango. Ekosalema mpenza na Boyei ya Klisto, mpo Klisto alobaki ete moto moko te ayebaki ntango Akozonga.

392 Bomonaki, ntango Bayuda batunaki Ye motuna yango? Boyebi . . . Ntango tokokanisaki Makomi ya Matai 24, ná Bilembo motoba, elobelaki Elembo ya Nsambo te. Mpamba te, bomoni, Klisto alobaki: “Bobeze Nzambe Ye moko nde ayebaki; ata Banje, bayebaki te.” Kokamwa te, Ekomamaki ata te. Bomoni, bafandaki kimia; eloko moko te esalemaki na ntango yango. Banje bayebi Yango te. Moto moko te ayebi ntango Azoya.

393 Kasi ekozala na mi—mi—Mingongo Nsambo, ya baNkake oyo, oyo ekomonisa emoniseli monene na ntango wana. Boye, nandimi, biso baoyo . . . Soki toyebi Yango te, mpe soki to . . . Ekoyebana te liboso na ntango yango. Kasi ekomonisama na mokolo yango, na ngonga oyo yango esengeli komonisama. Boye, likambo oyo biso tosengeli kosala ezali kozala na limemia liboso na Nzambe, mpe kosalela Ye, mpe kosala nyonso oyo tokoki kosala, mpe kobika bomoi ya malamau, ya Baklisto. Awa, sikawa, tomoni ete Elembo ya Motoba esili kofungwamela biso; tomoni

Yango. Mpe toyebi ete Elembo ya Nsambo oyo ekoki kozipolama liboso na bato te, kino ngonga yango ékoma.

³⁹⁴ Sikawa, ezalaki na ntina moko, oyo Nzambe atikaki ete Mingongo Nsambo oyo énguluma. Mpamba te, Esengeli koya, bomoni. Mpamba te... Tomonaki ete Klisto, Mwana-mpate, azuaki Buku na—na loboko na Ye, mpe Afungolaki Elembo ya Nsambo yango. Kasi, bomoni, ezali libombami oyo ebombámi. Moto moko te ayebi Yango. Kasi, E—Eyokani mpenza ná oyo Alobaki: “Moto moko te akoyeba Boyei na Ye.” Bakoyeba mpe te na ntina na libombami ya Nkake Nsambo oyo. Boye, bomoni, ezali kotámbola elongo.

³⁹⁵ Yango mpenza, tosósoli mingi eteni na Yango lelo, mpo nyonso Mosusu ezipolami; kasi oyo ezipolami te. Kasi ntango nafandaki na chambre na ngai, nayokaki oyo... to, nayokaki te, kútu, kasi namonaki Yango kozipolama na baNkake Nsambo oyo. Sikawa, tkoki kokende mosika koleka wana te, kaka wana mpenza.

³⁹⁶ Sikawa natii motema ete moko na moko na bino akosalela Nzambe mpe akosala oyo ezali malamau. Bólinga Ye, bomoi na bino mobimba, mpe bósálela Ye. Mpe Nzambe akotala makambo oyo etikali.

³⁹⁷ Sikawa, tosilisi, na mobimba awa sikawa, na ngolu ya Nzambe, mabombami nyonso ya Bilembo motoba oyo ezalaki ya kokangama, mpe tosósoli mpe toyebi awa ete Elembo ya Nsambo esengeli koyebana na bato nyonso te.

³⁹⁸ Sikawa, Boyei na Ye, na ngonga ya Boyei na Ye, ntango mabelé ekobebisama, boyebi. Kuna Alobaki: “Elembo nini ekotalisa boyei ya nsuka ya mokili?” Na Matai 24 nde batunaki Ye motuna yango. Alobelaki yango kino wana. Alobaki na ntina na Yisraele kosangana lokola ekólo, na molongo ya 31, ya Matai 24:31. Kasi na nsima, Abandaki koloba na masésé, bomoni. Na bongo, bomoni... “Bóyekola lisésé ya nzete ya mosuke. Ntango bomonaka yango kobimisa nkasa ya sika, ee, boyebaka ete eleko ya printemps ekómi pene. Na bongo, ntango bokomona likambo oyo kosalema, na bongo, bóyeba ete ntango ekómi pene.” Bomoni, Yisraele azali kosangana na mabelé na yango moko. Kasi, bótala, Alobelaki emoniseli ya Elembo ya Nsambo te.

³⁹⁹ Mpe awa, ntango Elembo ya Nsambo, ntango Afungolaki Yango, lisusu, Alobelaki Yango te, bomoni. Boye, tomoni ete, na mobimba na yango, Ezali libombami, boye, ngonga oyo libombami yango esengeli koyebana ekoki naino te. Na yango, toyebi kaka kino awa, mpe Oyo etikali ekoyebana mpenza pene na ntango oyo Yesu akomonana lisusu na mokili, mpo na Mwasi na libala na Ye, to likambo oyo ekosalema na ntango wana. Sikawa, liboso ntango yango éya, tika ete biso nyonso tóbondela, tóbika bomoi ya malamau, ya sembo, ya Baklisto, wana tozali kozela Boyei na Ye na motema lúkú-luku.

⁴⁰⁰ Sikawa soki esalemi ete bande oyo ekwei na maboko ya bato moko esika moko, bómeka kokómisa yango lokola izme moko boye te. Likambo bobele moko oyo bosengeli kosala ezali ete bókoba kosalela Nzambe. Mpamba te, sekele monene oyo ezali monene mingi na lolenge ete Nzambe atikaki te ete Yoane ákoma Yango. Engulumaki, kasi A . . . koyebáká ete, na kolakáká biso ete Ekofungwama. Kasi, kino lelo, Efungwami te.

⁴⁰¹ Sikawa tozongisi matondi na Nzambe mpo na oyo Asili kotalisa biso. Nafandaki kuna na kati ya chambre mikolo mwambe. Mpe Nsango oyo nauti kosilisa kolimbolela bino, mingi kati na bino awa bokosósola. Mpe nalakaki ete likambo moko ezalaki kosalema, na ngámbo ya molimo, ntango nyonso, oyo nandimisamaki mpenza ete bozángaki komona yango. Mpe likambo yango ezali oyo; ezali botatolami mpenza ete ndimbola oyo ya Makomi, Nzambe nde atindi yango.

⁴⁰² Mpamba te, liboso kútu tóbanda Yango, mpe liboso nákende na westi, Nkolo alakisaki ngai emononeli, mokolo moko, pene na ngonga ya zomi ya ntongo. Mpe nayaki kolimbola yango awa, ete namonaki yango; nayebaki te oyo yango ezalaki. Ezalaki lisanga ya Banje nsambo. Tokomikanisela yango. Bokoyoka yango na bande ya liteya *Tokómi Ntango Nini, Misie?* Ee, sikawa, yango mpenza nde bozali komona sikawa. Banje nsambo . . . Nazalaki na westi.

⁴⁰³ Bómikanisela, batindami ya mike-mike; bakendeki na esti. Batindami ya mibale, bibengá, bandeke ya mwa minene koleka, bakendeki na esti. Mpe nsima natálaki . . . Bango bazalaki ntango nyonso ná ngai elongo. Ezalaki Pull ya Liboso ná ya Mibale.

⁴⁰⁴ Sikawa, oyo ya Misato bautaki na westi, bakómaki wana na mbangu mingi mpenza, mpe Bamemaki ngai na likoló. Ezalaki mpo na kozonga na esti, ná libombami ya Bilembo Nsambo oyo. Kaka ndenge elobamaki na—na ndoto ya Junior Jackson, oyo Nkolo apesaki ngai nzela ya kolimbolela ye kuna, “Na kati ya pyramide yango, Libanga ya mpembe ezalaki kuna, oyo ezalaki na nkómá te likoló na yango.” Yango wana nasengelaki kokende na westi, mpo na kokutana ná Nsango ya Banje yango, kozonga awa mpo na komonisa Yango na lingomba. Bómikanisela, nalobaki: “Makambo elandi oyo ekosalema, ekosalema awa na losambo.” Esalemi mpenza bongo.

⁴⁰⁵ Likambo mosusu, nalingi ete bótala malamumu eloko oyo esalemaki. Soki boyoki bande ya liteya *Tokómi Ntango Nini, Mesie?*, bokomona ete Mwanje moko azalaki mpenza ndenge mosusu mpo na ngai. Bamosusu na bango bazalaki kaka bongo-bongo, tóloba. Kasi Mwanje oyo azalaki Mwanje ya ndenge mosusu. Azalaki na loboko na ngai ya mwasi, na kati ya lisanga ya lolenge ya pyramide.

⁴⁰⁶ Mpe, bómikanisela, Libanga ya mpembe ya kokamwa, oyo ezánga nkomá likoló na yango, ezalaki na kati ya pyramide. Mpe Banje yango bamemaki ngai na kati ya pyramide oyo esalemaki ya Bango moko, mabombami ya Nzambe eyebanaki bobele na Bango. Mpe, sikawa, Bango bazalaki Batindami oyo bayáki kolimbola pyramide yango, to Nsango ya sekele ya Bilembo Nsambo oyo ezali na kati ya pyramide.

⁴⁰⁷ Sikawa, Mwanje yango azalaki na loboko na ngai ya mwasi, azalaki mpenza ya nsuka, to Mwanje ya nsambo, soki totángi Bango kobanda na loboko ya mwasi kino na oyo ya mobali. Mpamba te, Azalaki na loboko na ngai ya mwasi; nazalaki kotala Ye, na ngámbo ya westi, Ye azalaki koya na esti, Azalaki na loboko ya mwasi. Boye, yango esengeli kozala Nsango ya mwanje ya nsuka, ya ndenge mosusu mpenza. Bómikanisela ndenge nalobaki ete Atiaki, Azongisaki motó na nsima; Azalaki na mapapu minene ya sòngé; mpe Apumbwáki sémba kino epai na ngai. Sikawa, oyo wana nde Elembo ya Nsambo. Ezali likambo ya ndenge mosusu kino sikawa. Mpe tozali... Toyebi te oyo Yango ezali, kino sikawa, mpo Ezui naino ndingisa ya kozipolama te.

⁴⁰⁸ Kasi sikawa, moko na moko na bino, awa na liyangani, bosili komona yango, ezalaki liyangani moko ya ndenge mosusu! Emonanaki lokola moto nyonso azalaki na... na nsuka ya kiti na ye. Mpe bato nyonso awa na ngonga ya liboso to ya mibale na nsima ya nzánga, bazalaki kozela ete bikuke éfungwama, mpo báfanda awa na liboso. Bato batelemaki pembeni na bitutu; ná makolo mpasi, mpe nyonso wana.

⁴⁰⁹ Ezali nini? Ezalaki Molimo Mosanto nde azalaki kotinda Batindami oyo, mpe Bango nde bazalaki komonisa biso Yango. Na bongo, botala ndenge Eyokani malamuni mpenza ná Liloba.

⁴¹⁰ Na bongo mpo bino nyonso bóyeba ete ezali Solo, Alobaki yango liboso, ekokisi pene na—pene na sanza mibale sikawa, to koleka, liboso etikala kokokisama. Wana nakendeki na westi, kozanga koyeba Yango; nazongaki awa ná ndimbola, ndenge Apesaki Yango. Sikawa bómikanisela, na kati ya emononeli, Ayebisaki ngai eloko moko te na kati ya emononeli, ntango Amemaki ngai na likoló. Nazalaki kobánga, kobanga ete nakokufa, nakobomama na lokito moko. Bomoni, Bango bakokaki kosala yango te.

⁴¹¹ Ndimbola eyaki moke-moke, wana nazalaki na bosenga na Yango, elingi koloba na kati ya biró, mpe napesaki Yango mpenza kaka ndenge Apesi Yango.

⁴¹² Sikawa, bomoni, baninga, bimononeli ekweyaka te. Ezalaka ntango nyonso ya kobonga be. Ezalaka mpenza-mpenza solo.

⁴¹³ Sikawa, emononeli, bakísá Liloba, bakísá histoire, bakísá bileko ya lingomba, ná nyonso wana, ezali na boyokani mpenza. Boye, nakoki mpenza koloba ete, na lisósoli na ngai nyonso, mpe

kokokana na Liloba na Nzambe, ná emononeli, ná emoniseli, ete ndimbola na Yango ezali YANGO ELOBI NKOLO.

⁴¹⁴ Sikawa, Nkolo ápambola bino nyonso mingi mpenza, moko na moko, wana totelemi sikawa mpo na koyemba loyembo kitoko ya kala, ya lingomba. Nzambe ápambola bino, moko na moko. Amen.

⁴¹⁵ [Ndeko Branham abakisi milongo minei oyo ezali kolanda, ezuami na paragraphe 374-375 ya Liteya na ye ya lobi na mpokwa, mokolo ya 24 na sanza ya Misato, na mobu 1963 – Mok.]

Na... (Nzambe ápambola bino!)... Nalingi
Ye, (na motema mobimba),
Mpo Alingaki ngai liboso.

Nzambe ápambola yo, Ndeko Neville...?... Tíkala na esika ya mosala...?... 

63-0324^E Elembo Ya Nsambo
Branham Tabernacle
Jeffersonville, Indiana U.S.A.

LINGALA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamama na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org